

重刻釣臺集序

釣臺主人楊東謨序

余讀東漢逸民傳至嚴先生未嘗不三嘆爲巢  
由之後一人六已從計偕舟次釣臺登其祠瞻  
之低回不忍去歲辛巳一夕偶夢先生魏剗博  
帶來顧余余爲之竦然起敬也無何而余拜桐  
廬令獲通先生至則首謁先生祠再拜而椒漿  
之已復取釣臺集刪補之而僭叙首簡曰甚哉  
出處之義不明于天下而隱德之士遂消而莫

辦也夫士君子之處也在于蘊其出之之具而  
出也所以致其處之之用身有潛見而義無二  
致故出在素修見于世處在完蟄存于身諒其  
身而後出不敢出以失其身故出不能全處者  
導欲之媒也處不能基出者好名之玷也聞之  
太史王維禎先生論隱有四術謂炯然抱奇固  
請不出者石隱也才一出而輒即收者高隱也  
度無所見而託號以覆短者智隱也空以身爲  
稿木朽株者癡隱也乃邵荆與顏闔鮑焦爰旌

目之徒而俛有取于段干木魯仲連者大都重  
才譖而志節之略也嗟乎才譖志節可偏廢哉  
然兼之者鮮矣若嚴先生者寔千古天民而隱  
入于聖者也豈四術所能云哉方光武之未起  
也先生久爲白水之遊先生所學已素重于光  
武光武所究亦精鏡于先生世惟見天子之極  
貴而不知天民之尤尊見帝徵先生之勤也遂  
謂帝可爲堯舜之主見先生之不就也遂謂先  
生非孔顏之學嗟乎光武真可堯舜哉先生豈

真戾孔顏之軌哉夫謂用之則行者以其志之  
合也先生所抱仁義而帝則圖識之崇先生所  
疾阿順而帝則君房之合輕更守令吏貴三公  
朱浮以上相免韓歆以鯁直亡且也先生是時  
年逾耳順齒尊德邵不能待以賓師之禮而以  
詔書從事不從則呵之以狂奴敦久要之誼者  
若是乎假令先生拜諫議一拂其旨幾何而不  
罹狂奴之辱也睹其廢郭立陰夫婦之際猶不  
終淑而謂貧賤之交可異其全哉先生固見之

豫矣出處之義亦已籌之熟矣蓋諒其上未必  
爲堯舜之君而其出未必與唐虞之治故寧以  
其身置宇宙之外而因狹乎宇宙以其心遊萬  
物之表而且細乎萬物卒之桐江一絲扶漢九  
鼎廉頑立懦可風百世謂先生爲隱之聖者豈  
其過哉豈其過哉論先生者或未觀其深余故  
特從而表著之以致高山仰止之私焉  
萬曆十三年歲始乙酉星鳥月朏夷日



國家圖書館 NATIONAL CENTRAL LIBRARY TAIWAN, R.O.C

新編  
通志  
卷之  
五

釣臺集卷之上

知桐廬縣事建安楊東

番禺曾振宣

巴蜀劉嵩

刊重

南宋謝靈運

羈心積秋晨晨即屢遊眺孤客傷逝湍徒旅苦  
奔峭石淺水潺湲日落山照曜荒林紛沃若哀  
禽相叫嘯遭物悼遷斥存期得要妙既秉上皇  
心豈屑末代諄目覩嚴子瀨想屬任公釣誰謂  
古今殊異世可同調

唐李白

松柏本孤直，難爲桃李顏。昭昭嚴子陵，垂釣滄波間。身將客星隱，心與浮雲閑。長揖萬乘君，還歸富春山。清風灑六合，邈然不可攀。使我長嘆息，冥棲巖石間。

孟浩然

余奉垂堂誠，千金非所輕。爲多山水樂，頻作泛舟行。五岳追尚子，三湘吊屈平。湖經洞庭濶，江值新安清。復聞嚴陵瀨，乃在北川路。壘嶂數百

里，汭泗非一趣。彩翠相氛氲，別流亂奔注。釣磯平可坐，苔磴滑難步。猿飲石下潭，鳥還日邊樹。觀竒恨來晚，倚棹惜將暮。揮手弄潺湲，從茲洗塵慮。

張祐

七里垂釣叟，還傍釣臺居。莫恨無名姓，嚴陵不賣魚。

張謂

子陵沒已久，讀史思其賢。誰謂潁陽人，千秋如

此有嘗聞漢皇帝曾是曠周旋名位苟無心對  
君猶可眠東過富春渚樂此佳山川夜卧松下  
月朝看江上烟釣時如有待釣罷應忘筌生事  
在林壑悠悠經暮年于今七里瀨遺跡尚依然  
高臺竟寂寞流水空潺湲

劉長卿

潺湲子陵瀨髮鬢如在日七里人已非千年水  
空綠新安江上孤帆遠應逐楓林千萬轉古臺  
落日共蕭條寒水無波更清淺臺上魚竿不復

持却令猿鳥向人悲灘聲山翠至今在遲爾行  
舟晚泊時

洪子輿

漢王召子陵歸宿洛陽殿客星今安在隱跡猶  
可見水石空潺湲松篁尚葱蒨  
嶺深翠陰合川迥白雲徧  
幽徑滋蕪沒荒祠幕霜霰  
垂釣想遺芳掇蘋羞野薦  
高風激終古晤語忘榮賤  
方驗道可尊山林情不變

奚賈

日入溪水靜棲真此亦難乃知滄州人道成仍  
釣竿漾棹坐微月振衣生早寒紛吾誠獨往自  
速耽考槃已息漢陰誚且同濠上觀曠然心無  
涯詎問容膝安

顧况

靈芝產遐方威鳳駕重霄嚴公何耿潔託志肩  
夷巢漢后雖則貴子陵不知高糠粃當世道長  
揖夔龍朝掃門彼何人異降不同朝舍舟遂長  
往山谷多清飈

南宋謝靈運

一瞬即七里箭馳猶是難樞遠走嵐翠枕底失  
風湍但訝猿鳥定不知霜月寒前賢竟何益此  
地詿垂竿

唐羅隱

遠岸平如剪澄江靜似鋪紫鱗仙客馭金顛李  
衡奴冷疊晴山闊清幽萬象殊嚴陵亦高見歸  
卧是良圖

唐胡曾



七里清灘映碧層九天星象動嚴陵釣魚臺上  
無絲竹不是高人誰解登

宋姜特立

不為故人屈清名日月懸當時若相漢不過比  
元侯功易歌子陵名不滅所以天壤間貴重是名節

宋洪梓

客星漢宮中輕冕浮雲輕羊裘富春山釣以千  
丈清至今高世譽若揭日月行孰與龔山徒隱  
身復隱名

杜牧

鮮印書千軸重陽酒百缸涼風滿紅樹曉月下  
秋江岩壑會歸去塵埃終不降懸纓未安濯巖  
瀨碧淙淙

許渾

天晚日沉沉孤舟繫柳陰江村平見寺山郭遠  
聞砧樹密猿聲響波澄鴈影沒榮華暫時事誰  
識子陵心

權德輿

絕頂聳蒼翠清湍石磷磷先生晦其中天子不  
得臣心靈棲顛元軒冕猶緇塵不樂禁中計却  
歸江上春潛驅東漢風日使薄者醇焉用佐天  
子持此報故人則知大賢心不獨使其身弛張  
有深致耕釣陶天真柰何清風後擾擾論屈伸  
交情同市道利欲相紛綸我行訪遺臺仰古懷  
逸民矰繳鴻鵠遠雪霜松挂新江流去不窮山  
色凌秋晏人世自今古清輝燦無垠

歐陽詹

弭棹歷陳迹悄然關我情伊無昔時節豈有今  
時名辭貴不辭賤古心誰復行欽哉此溪曲永  
激英風聲

劉駕

澄流可濯纓嚴子但垂綸孤坐九層石遠笑清  
渭濱潛龍飛上天四海豈無雲清氣不零雨安  
使澆埃塵我来吟高風彷彿見斯人江月尚皎  
皎江石亦磷磷如何臺下路明日又迷津

吳融

水送山迎入富春一川如畫晚晴新雲低遠浦  
帆來重潮落寒汀鳥下頻未必柳間無謝客也  
應花裏有秦人嚴光萬古清風在不敢停橈更  
問津

許渾

潮去潮來洲渚春山花如錦草如茵嚴陵臺下  
桐江水解釣鱸魚有幾人

王貞白

山色四時碧溪光七里清嚴陵愛此景薄視漢

公卿垂釣月初上放歌風正輕應憐渭濱叟匡  
國祗論兵

異代有巢許方知嚴子情舊交雖建國高卧不  
求榮水鳥寒來浴汀蘭暖重生何顏吟過此辛  
苦得浮名

宋王安石

漢庭來見一羊裘默默俄歸舊釣舟迹似磻溪  
應有待世無西伯可能留崎嶇馮衍才終廢索  
莫桓譚遣不謀勺水果非鱸鮓地放身滄海亦

何求

范仲淹

漢包六合網英豪一箇冥鴻惜羽毛世祖功臣  
三十六雲臺爭似釣臺高

蘇轍

扁舟忽復出山來慚愧嚴公舊釣臺舟子未應  
知此恨夢中飛楫定誰催

毛玘

洲渚寒雲薄暮天蕭蕭燈火落帆邊嚴陵灘下

孤舟遠一夜歸心聽雨眠

方干

蒼翠雲峯開俗眼碧澄烟水浸塵心惟將道業  
爲芳餌釣得高名直到今

石孝友

桐江波上一羊裘釣得聲名隘九州天子曷嘗  
遺故舊先生不肯事王侯

李綱

昔年曾上釣溪頭夢想滄浪一葉舟今作太平

真隱吏不須辛苦看羊裘

世祖馳驅復漢家故人高卧老烟霞至今只說  
羊裘好拜袞誰思鄧仲華

吳棫

一水自東流蕭蕭霜木秋笑談輕萬乘身世老  
扁舟薄俗迷方餌高人悟直鉤至今馴不散沙  
上晚來鷗

陳淵

溪山有底好適契貧士欲千秋釣臺水不濯市

朝足而我獨何人得寓塵埃目携筇縱朝步初  
日穿林麓西風扶兩腋一舉千里鵠東窺夫差  
國繁華混真俗獨流駕顏波一往不可復之子  
居其間嗜古追前躅為寄無絃琴一和郢中曲

陳埴

十年不泛釣臺船夢想高風落日邊今日偶然  
無住着再嘗灘下煮茶泉

蘇軾

不作三公歸來釣桐廬江側劉文叔眼青不改

故人頭白風節儻能關社稷雲臺何必圖顏色  
使阿瞞臨死尚稱臣伊誰力○登釣石初相識  
漁竿老羊裘窄除江山風月更誰消得烟雨一  
竿雙槳急轉頭不分青山隔嘆鼻端不省利名  
羸京華客

右調滿江紅

王十朋

竊食三州媿不才扁舟又過子陵臺心知敬慕  
先生節乞得祠官歸去來

趙作

帝念先生素所親殊恩終不顧絲綸圖勲耻與  
凌煙像辭貴甘爲把釣人雲水孤高敘適意俗  
風奔競使還淳如今丘壑無遺士天子思賢號  
聖神

姜特立

兩山夾青蒼月照江茫茫陶然酌桂醕孤興發  
滄浪賢哉羊裘翁不肯仕漢光冥鴻已高翥弋  
者應相忘

戴復古

萬事無心一釣竿三公不換此江山平生恨識  
劉文叔若得虛名滿世間

王巖叟

桐江快人眼江水綠於苔一棹中流去千山兩  
岸來風搖黃蘗落潮捲白沙開欲問嚴陵事雲  
中望釣臺

潘時

古屋巔岩上荒祠落葉中乞靈無俗駕垂世有  
高風鳥語谷相答魚遊溪若空徘徊欲忘去舡

北  
背夕陽紅

葉三省

漢主當年曾側席先生高卧無人識一竿孤竹  
釣清風七里飛灘寓真跡森森古木知幾年凜  
凜巖祠到今日我來瞻拜興無盡留戀烟波歸  
未得

方岳

佳處何妨住江晴倚落暉野舡穿樹過溪鳥帶  
雲飛寺有唐碑古山羞漢鼎非長安多過客留

墨浦臺磯

范浚

我笑賀知章乞得鑑湖水嚴陵釣清江何曾問  
天子

曾鞏

波光山翠浮雲收纖毫鑒徹澄清流紫鱗撥刺  
泳柔藻白鷗來往隨扁舟嚴陵當日看羊裘森  
森臺榭風月秋祿位之榮何不求故人心在恢  
炎劉矣劉輝煌心已休一溪烟靄終白頭不學

尋常釣名者與時進退徒悠悠

林景熙

客星謫下桐江湄傲睨烟雨何年歸空遺清氣  
滿林壑草木不受春風肥我來維舟奠椒醑薜  
荔祠荒泣山鬼亂峯欲雪江氣嚴老蜃吹雲日  
色死白水真人御絳衣勲臣四七攀鱗飛冥鴻  
遐舉不可致天地浩蕩容漁磯季年熏貂戎黨  
獄阿瞞朶昂終瑟縮東都節義何為高七尺之  
臺一竿竹



趙善相

有漢嚴夫子恭惟帝者師道關民物大身混草  
萊卑諫議論交日絲綸獨釣時窮通本無異不  
使俗儒知

陳康伯

閑來溪上看雲飛溪光接翠微江南三月落花  
時春波去擢遲○尋竹路破林扉蒼臺舊釣磯  
欲歸回首未成歸黃埃滿素衣

右調阮  
郎歸

趙希明

宋梅堯臣

不顧萬乘主不屈千戶侯手護百金魚身披一  
羊裘借問此何耳心遠忘九州青山東寒灘濺  
浪驚素鷗以之為朋親安慕乘華輶老氏輕璧  
馬莊生惡犧牛終為蘊石上負古輝巖隙

宋司馬光

吾愛嚴子陵結廬隱孤亭灘頭釣明月光武勃  
龍興三詔竟不至萬乘柱駕迎吁嗟今世人趨  
走公卿庭締交亦歡悅意氣頗驕矜其如古賢

操松筠耐雪冰

宋陳良祐

矯矯蟠龍姿拿雲起殊方挺挺古松幹傲霜辭  
棟梁龍已升天衢鳳猶卧高岡所以嚴先生不  
從真人翔迹披羊裘誰能換金章長揖萬乘  
君力詆諸侯王兩言合古道千載有餘芳清風  
滿四海使我長激昂

宋楊時

漢網久陵遲國柄收權室中興得英主威明戒

前失三公經邦手吏事困精覈功臣欲圖全猶  
不任以職矧茲故人分義等天倫戚卓哉子陵  
心秉哲固前識投身秦名爵豈得枉尋尺萬鍾  
雖云富樊雉非予匹石瀨清且泚蒼崖聳而直  
揭竿事幽尋釣冰鮮可食羊裘御冬温衮繡未  
云益三旌屠羊肆義在不吾易周舍各有趣高  
風亘今昔

扁舟東過幾時還一夕飛帆插羽翰回首嚴陵  
臺上月清風千古逼人寒

君不見釣璜溪上白髮翁一竿西去追冥鴻  
車載得非羆熊鷹揚烈氣如飄風又不見羊裘  
石瀨垂綸叟爽氣凌天動星斗萬乘故人親訪  
求卧對鑿與忍白首聖賢遇合自有時紫身亂  
倫非所知高風寥寥古已往較然得失知者誰

宋曾鞏

許由不喜堯巢父獨洗耳後世紛紛輩疑此言  
詞鄙寥落天地間千載無高軌勢利兩相競流  
風日靡靡先生出其中志節一何偉笑傲烟雲

溪卧石釣江水羊裘步漢庭交道誰比擬強出  
忽復歸富貴猶敝徒回首危臺丹霞隨步履  
四顧山光幽清風拂然起

清高百尺臺綠淨七里瀨密樹去颺留長峯過  
雲礙身安匹夫賤氣驕天子大廣臆卷經綸寸  
舌收利害顧我事篇章與君殊氣槩言榮屢見  
辱倖成不殊敗偶來揖高風壯懷生耿介

宋林合

耿耿浴潭月溶溶出岫雲相逢抑何心風定波

不紋天宇掃纖翳銀河淡無塵乘槎擬問津愧  
此山中人

日出掩荆扉有人尚高卧袖手静觀處汗顏幾  
塵過伊予何為哉始勤戒終惰空餘梁父吟一  
唱自三和

方丈五鼎食歲晚百結衣貧富非可求言行寧  
相違滄波浩與窮白鷗兩忘機此意不同塵終  
焉依釣磯

彼妹者何斯楚楚明衣裳厭渠朱粉飾浣此山

雲臺士願學先生事隱淪

山水高長子陵節桐廬瀟灑范公詩又吟處士  
清新句蟬拽殘聲過別枝

宋何逢原

古人出處不為己所願四海皆無虞諸公聞已  
佐明主一壑正應容老夫世人見事苦不憤此  
豈有意高寰區白雲深處數間屋斷碑倚壁何  
紛如

宋朱漁之

真人自合龍御天故人不得撐漁船尊鱸端可  
敵鍾鼎簞笠未必輸貂蟬雲臺圖畫竟塵上釣  
臺溪山只如古白鷗笑盡往來人何事匆

每不停櫓

宋沈清臣

桐廬之山屹如址桐江之水清見底間闕萬里  
却歸來依舊此心如此水子陵一節壽漢脉名  
與山高俱不死惜無陋巷為邦學禮樂不

聞古  
人耳

宋韓維

不見狂奴態秋江古木悲高名共流水舊俗尚

荒祠孤竹死何益商山來已卑何勞動為治風  
節厚當時

使者仍三反先生僅一來高眠動星宿謾語笑  
公台散髮思遺像垂綸識舊臺知君懷古意風  
月共徘徊

萬乘親臨屈頽然一布衣高談方自若孤節竟  
誰為龍卧空鳴瀨鷗馴只釣磯精魂如可作夫  
子與同歸

宋吳棫

龍衮新天子羊裘古野人清名在林藪高行動  
星辰風月空齊國烟霞自富春滄浪秋更碧不  
敢濯纓塵

宋張孝祥

樹老參天直溪清白日閑先生元不死遺廟亦  
空山文彩雲來似風流正始閑平生子陵子何  
處可追攀

宋楊萬里

釣石三千丈將何作釣絲肯離山水窟去作帝

王師小范真同味玄英亦並祠老夫歸已晚莫  
遣客星知

宋杜存

斯人真隱處寂寞使人愁正著雙臺在還從一  
老遊涼風動陰壑斜日下滄洲灘下沉沉水潛  
魚一避鈎

宋趙善湘

小泊逢陰雨登臨得晚晴兩山浩然氣一水聖  
之清路險崖邊望臺窺閣外行何當清夜到到

是客星明

宋趙公介

建武新天下嚴陵舊故人君臣雖分邈道義只  
情親傲睨千鍾粟甘垂一釣綸至今臺下水不  
受軟紅塵

宋宋姓

讀殘高士傳起問釣臺津太史占星象官家是  
故人從來狂不諱老去懶成真一切功名表春  
容勝乞身

宋李夢符

故舊今天子勳賢盡徹侯絲綸幾魚膾立壑一  
羊裘神氣將歸魏人心未去劉君臣同卧處誰  
識此時謀

宋范端臣

此地有天險雙臺千仞岡眼寬知世窄望極使  
神傷萃嶺諸峯出紫紆一水長振衣懷古罷新  
句入斜陽

故人不肯到雲臺坐閱荒山暮景顏裘褐自將

龍衮敵蒲車休駕鶴書來千年實錄空文字高  
古清風動草萊慚愧君侯與披拂願添野水入  
金盃

山東大白謫仙人筆捲山河氣拂雲百代公卿  
嘲哂徧清溪石上想嚴君

宋謝翱

古臺臨釣渚遺像在蒼烟有客隨槎到無僧依  
樹禪風塵侵祭器樵獵避兵船應有前朝蹟看  
碑數漢年

宋胡則

占斷烟波七里灘漁簑輕拂漢衣冠高蹤磨出  
雲崖碧清節照令秋浪寒澤國幾家供廟食客  
星千載入雲端我來亦有滄浪興願借先生舊  
釣竿

宋孫覿

北塞風塵萬古輦東京社稷一戎衣綠林群盜  
驅民去赤伏真人得帝歸諸老蟬聯蒼玉佩將  
軍騎靛紫金鞵先生此日清霞志一笑凌空柱

就飛



故山遺像丹青落，蓋世榮名日月懸。萬馬群空  
冀北野，一輪獨游原上田。晚浦蒼波涵落日，秋  
崖老樹立蒼煙。直從鴈代騎星去，千里光

芒夜斗連

宋葉三省

臺上嵐光翠作堆，臺前竹迳掩蒼苔。此時醉夢  
鳥喚醒，何處梅香風遞來。俗客經年渾不到，松  
關竟日幾曾開。平生自笑微官縛，况我此

心今已灰

宋許廣淵

爵祿榮華不可縻，隱廬千載益光輝。殘孫猶奉

今祠室，絕巘長存古釣磯。灘水鎮流清德遠，天  
文誰識客星歸。門前軒冕紛紛去，一炷爐

香至者稀

宋劉克

足高不踏洛陽塵，千里羊裘為故人。歸夢祇因  
到巖谷，天文那覺動星辰。月寒江白烟波晚，雲  
暖山青草木春。到底東都名節在，肯將朋

舊廢君臣

宋潘檉

蟬冠未必似羊裘，出處當時已熟籌。但得諸公  
依日月，不妨老子卧林丘。英雄陳迹千年在，香

火空山萬木秋自咲紅塵吹髮客愛來祠

下繫行舟

宋丁逢

四七群雄野戰疲一龍安穩御天飛故人緣是  
甘盤舊大老終為西伯歸節義古來維世教精  
神今日動天機不然一卧君王榻便見光

芒微大微

宋呂聲之

七里灘頭訪子陵水光山色見生平欲為臣子  
定出處知與君王分重輕一介草茅真自負三  
公軒冕未為榮我來想像高風在釣石巖

前烟浪生

宋方有開

先生玉立伴玄英心與山空兩闡明已把羊裘  
甘閒寂肯隨龍衮耀光榮名扶汪禹千鈞重風  
激巖灘七里清試向漁磯問蹤跡白雲深

處綠簾輕

宋虞傳

名節於公未易齊左符又向浙江西敬瞻遺像  
烟塵表祇覺平生事業低勒回俗駕顏何厚重  
上危臺望欲迷出處有時還有義鷹揚豈

必愧稽溪

宋程仁

兩邊山翠撲人衣百折溪流蘸翠微清淨更無  
塵可污高閑欲與世相違放舟盡日經幽渚臨  
水何時出半扉此意江神如領解更甘身老釣  
漁殘

宋盧襄

從昔徵君屈復伸羨君終始脫風塵清時不肯  
投芳餌晚節誰能事故人千古聲名空白水一  
臺蘿荔自清春翻令指點商山皓鶴髮星更  
入秦  
釣臺突兀斷厓傾臺下荒祠陰古榭朋友君臣  
俱大義江山日月自高名幡然未負湯三聘逝

矣何慚魚鳥兩生葦菜鱸魚晚堪薦驛舟淹

宿有  
餘情

宋范仲淹

瀟灑桐廬郡嚴陵舊釣臺江山如不勝光武肯  
教來

宋錢聞詩

無復塵勞夢猶蒙故舊知寧辭萬鍾祿不負一  
綸絲

宋黃庭堅

平生久要劉文叔不肯為渠作三公能令漢家

重九鼎桐江波上一絲風

古風蕭索不言歸貧賤交游富貴稀世祖若非  
天下量嚴陵安得釣漁磯

宋李綱

四七功臣符列宿雲臺圖畫炳丹青何如靜夜  
天文裏帝座傍邊見客星

宋張浚

古木籠烟半鎖空高臺隱隱翠微中身安不羨  
三公貴寧與漁樵卒歲同

中興自是還明主訪舊胡為厲老臣從古風雲  
由際會歸與聊復養吾真

宋胡安國

歸隱桐江知幾春靜看浮世一鷗輕此心在世  
元無着誤說持竿是釣名

宋鄭剛中

一舉無心為六鰲萬鍾於我亦毫毛客星不到  
雲臺上莫訝先生索價高

宋張昉

真人已推九虎衆  
客子獨釣一羊裘  
兩翁所得孰輕重  
江水無情空自流

宋張仲可

千古巖陵一釣磯  
客星隱者遜何肥  
他年黨錮生竒禍  
翻使吾儂說是非

宋范成大

溪色嵐光絕點埃  
十年遊倦得重來  
簿書叢裏身猶健  
冒雨衝烟上兩臺

山林朝市兩塵埃  
邂逅人生有往來  
各向此心

安處住釣臺無意壓雲臺

宋康與之

建武中興寶運開  
股肱俱是濟時才  
漢家鼎祚如磐石  
此老方圖拂袖來

宋宋石

短篷西下雨班班  
只得臺邊半日閑  
沙鳥不知人意別  
依然飛入水雲間

宋魯集

遺址猶存萬事空  
羊裘何有漢三公  
澄江疊嶂

故無恙今古一川夷惠風

宋陳南紀

未用客星侵帝座正須折簡傲三公誰知擲釣  
羊裘士醞就東京節義風

宋毛汧

袞衣但決妖邪識茅土先封不義臣須信佞隨  
鷄鶩食豈如湖海一閑身

白鶴千秋去不歸山川蕭瑟闕光輝孫郎祖墓  
今無主不及先生一釣磯

漢業中興彼一時先生名與日星垂南陽遺廟  
今荒草何世桐江百世祠

洲渚寒雲薄暮天蕭蕭燈火落帆邊嚴陵灘下  
孤舟遠一夜歸心聽雨眠

宋虞傳

橫足論交萬乘輕富春山水足平生從教太史  
占星變自是難忘故舊情

宋趙思處

臺前烟水近天流不是漁人也繫舟却笑羊裘

釣竿直封侯輸與曲如鉤

宋鄭大成

貂冕漁竿本一機時人偏向昧幾微古今出處  
無遺憾只有磻溪與此磯

宋方季隨

雲臺冠劍俱塵跡何似橫竿坐巍石應笑商山  
皓首翁出爲儲闈成羽翼

慚愧重經舊釣臺追思往事晚蒼苔天子莫回  
高隱志典司癡望故人來

宋葉義問

久向朝端坐要津特來臺上拂閑雲江山風月  
總如此今古傍人莫強分

宋趙公碩

世祖龍飛天地開故人屢趣日邊來先生堅臥  
寒溪上千古高風祗釣臺

宋顧南仲

桐江波上獨垂綸爵祿浮雲懶致身儻謂釣臺  
風月好湄濱安有擲鉤人

宋黃景說

羊裘不肯博珠金千古江山只一人誰道潔身  
空自好姦雄老死為稱臣

宋許知新

聖主龍飛登九五故人垂釣碧波深祠堂再拜  
先生像消盡人間奔競心

宋鄔堯誠

漢俗阿諛挽莫回先生屹立障波頽羊裘不換  
金章貴千古清風一

宋李泂

極知天下久紛紛今日諸賢樂有君可是踈狂  
偏左計身名只愛此江濱

當年事豈類由夷不肯簪裳換釣絲堂陛已成  
誰舊故先生終似欠時宜

臨江悵羨幾何人未必忘懷一寸鱗擾擾爭垂  
釣竿手先生元不會伊緡

宋魏中復

細看真人只故人客星肯作漢廷臣釣臺終老



溪山勝獨笑鷹揚厭渭濱

懷仁輔義天下悅阿諛順旨要領絕一時正論  
動君王千古清名懸日月

宋孫叔豹

萬水千山得得來先生籌度有心哉若留漢室  
公卿位未必清風識釣臺

壯歲曾經浩蕩來幾番高浪拍春雷誰知老子  
頭垂白再展絲綸上釣臺

當年憤激思明主不是徒干厚祿心可惜英雄

祇空老語言今已帶吳音

上有平田足力耕恃權豐已肆從衡遂令祠下  
生秋草誰謂先生道不行

宋趙不懌

真人難得故來惟愛滄浪歌水赴天地不閑  
兩磐石巋然千古子陵臺

鈴閣新詩續古詩等閑筆力到精微幾年嚴瀨  
重題品風滿雲山月滿磯

宋柴幾

漢家再造故人来野服羊裘可敬哉一夜客星  
侵帝座果令太史驗清臺

宋張亨辰

塵世功名特儻來營之逐之竟何哉靜觀不事  
王侯志千古高風獨此臺

宋鄭績

先生高志是重来軒冕焉能说我哉諸將區區  
爭尺寸當時真合作輿臺

宋汪知言

一檝東西往復來先生笑我謂何哉不問  
崢嶸去恐踏京塵沈兩臺

羊裘肯為故人來故態何云狂甚哉到底拂衣  
塵外去客星一夜奏清臺

宋唐仲濕

水遶山圍舊釣壇先生昔日此垂竿高風未泯  
人何在喜見雲來為整冠

宋譚良佐

挽葛攀藤到上頭西風吹動一天秋羊裘綸線

俱塵迹只有清名共水流

宋李誼

姜居渭水為周相嚴隱桐江不漢臣  
試把二公較名節誰知總是一絲綸

宋陳讜

來往何成謾白頭經過臺下使人羞  
當年去就一時事贏得聲名萬古流

天上客星那可忘世間人爵眇於毫  
一竿綠篠謾垂釣千古蒼崖爭仰高

宋高文亮

不事雲臺傍釣臺羊裘披拂脫塵埃  
先生高尚名千古人慕蜚聲競往來

艤舟臺下暑風清奇絕山川快此行  
二范傳碑垂不朽敢將蕪語汗先生

宋陳從古

天子論文即布衣交情深處有誰知  
不應閑却經綸手直上高臺理釣絲

客星一點耀光芒帝榻從容夜未央  
知道中興

功業就脫身歸去釣滄浪

宋方元直

山連輕靄水連雲縱棹霜溪曉色分試向漁翁  
問遺躅釣臺風月與心論

林疎葉脫占臺高當日垂綸本舊交不羨渭濱  
同載去萬鍾榮祿一鴻毛

桐江烟淨月涵秋山木輪囷矯翠虬遐想羊裘  
釣溪澤至今還有此人不

宋陳璘

貂蟬不肯換漁簑柰此灘頭釣叟何望影扶危  
猶歛避去筌前萬古只清波

宋楊寅

石崖千仞疊崢嶸上有崇臺接漢平會得先生  
當日意此心元不釣虛名

呂尚垂綸渭水湄投竿即作帝王師子陵終慕  
釣磯樂去就窮通各一時

宋董穎

先生臺下水分流俗客南來亦繫舟遐想羊裘

照清影白雲為餌月為鈎

宋徐暄

平日論交肺腑傾濟時何待位公卿一朝自信  
聲名重千古知富貴輕

宋宋暖

物是人非春復秋釣魚臺上碧灘頭雲烟礪帶  
無窮意不負當時隱客遊

宋趙不忼

太史當年奏客星漢皇增重故人情竭來獨釣

存名節萬古山高水自清

宋岑琬

流落江南老客星耕雲釣月已忘情如何又應  
玄纁去惹得狂奴故態名

宋錢崑

漢室中興二百春山河又見幾經爭釣臺屹立  
依然在萬古清風屬子陵

堯容巢父洗清流漢主何為苦追求伸足動星  
驚太史歸來依舊着羊裘

金臺集卷之十一  
宋蘇林

羊裘詎肯換金貂此意難言向汝曹萬古清名  
不磨滅凜然常與二臺高

創業西京第一功運籌決勝笑談中全身止願  
封留地兩漢于今仰二公

宋汪澄

客星千古富春山雪白羊裘舊釣竿堂下無人  
來買菜阿諛瞻拜膽應寒

先生不作漢丞相占斷空山幾百秋香火寂寥

祠宇陋却憑回祿與重修

宋黃泰

子陵釣拂桐江畔尚父竿投渭水濱出處不知  
誰底是擬將此意問漁人

過客問名還問利先生應笑亦應憐笑他不作  
買山計憐我買山無此錢

宋林合

世祖中興指顧間何妨老子釣江干誰知事向  
無心得千古清名已不刊

當日羊裘肯自高  
本心軒冕一鴻毛  
釣臺今作送迎地  
不愧先生笑爾曹

三年形役簿書叢  
來往扁舟夜月中  
驛得癡兒忙半日  
羊裘軒上揖高風

宋方岳

平生看破劉文叔  
不肯依來赤伏符  
低處只緣曾識面  
故應人喚作狂奴

小留不過貂蟬耳  
亦恐遭人白眼看  
已自費辭侯霸輩  
歸來漱石暮江寒



短棹夷猶七里灘  
人亡依舊水光寒  
漢家名節君知否  
盡在先生一釣竿

宋章才邵

漢業重恢百戰間  
君王側席嘆才難  
故人可是擎天手  
肯放桐江把釣竿

劉叔安

天於功業未全慳  
十者常勞智者閑  
猶是漢光能大度  
獨容故舊在江山

宋高似孫



宋黃次德

二十年前款釣津兩臺突兀眼中新只今雲木  
成蒼古自愧猶為走俗人

未易立談評出處但知擊節仰清風西湖秋菊  
寒泉供我欲今朝置此中

新刻摩挲成老句斷碑惆悵石湖題人間何處  
有今夕月滿空山水滿溪

白頭重到釣魚磯草木烟雲總入詩掃壁高題  
何用許大都只心安客星知

宋趙壽鄉

從宦區區四十春倦遊每自厭器塵馬蹄又踏  
長安道有愧桐江把釣人

宋孫文伯

宸居占見少微星故舊從容宿帝庭歸去翻然  
無一恨江山千古照英靈

趙汝遇

漢鼎鴻毛不足扛短策和雨下滄浪幾行尺牘  
青雲上莫笑狂奴老更狂

山中夜夜虹貫月知有異人泉石居浪把釣竿  
元莫釣先生不為食無魚

宋許浩直

青氈自是劉郎物白石堪為嚴子磯  
向人間長作對如何欲遣一籌低

往時刺刺說何事却喜如今已到頭惟有故人  
聊一士誰似先生節義心

扁舟獨上子陵灘一片秋烟萬疊山自笑塵緣  
何日了此身同寄水雲間

宋何夢桂

漢事如舟要着篙諸公已共濟風濤勳華終莫  
臣巢許莫道先生索價高

宋王秋江

饒舌從教奏客星衮衣爭似一絲輕當時只道  
歸來好不道歸來更得名

宋李清照

巨艦只緣因利往扁舟亦是為名來往來有愧  
先生德特地通宵過釣臺

宋釋了空

不肯佩他金斗印却將冷面看青山可憐整頓  
乾坤手閑在絲綸一釣間

宋釋北野

自過羊裘七里灘尋思欲見故人難殷動借問  
溪邊叟近日誰來把釣竿

宋錢可則

少同筆硯最相親脫避徵書不愛名高尚無心  
依日月一竿獨得聖之清

宋方可竹

謾衣羊裘釣澤雲無端惹起漢玄纁風標自與  
齊人異便着箕衣也識君

宋錢大椿

九重舟詔苦相徵一見辭榮返富春地老天荒  
臺共久清風萬古說垂綸

宋錢子豐

玄纁曾應拜重瞳此日如何不受封為愛富春  
山水好一竿歸釣月明中

不願封侯不事劉  
桐江獨釣一竿秋  
早知物色羊裘急  
何似和裘莫着休

宋陳山泉

宋陳道貫

足加帝座似癡頑  
詎肯折腰求好官  
明主莫將臣子待  
故人只作友朋看

宋顏子俞

千古英風想子陵  
釣臺綠草幾人登  
誰知避諱更嚴氏  
灘與州名總誤稱

宋黃由

豈是先生愛釣名  
先生端有故人情  
一時不受三公聘  
消弭群雄幾戰爭

宋陳疇

綠竹叢邊繫客船  
釣臺千古薄雲天  
區區寇鄧功如許  
何似高風獨凜然

故人已了中興事  
贏得溪頭一釣竿  
喚起先生同一笑  
青山自在白雲閑

宋胡寅

懷仁輔義人心喜要領保全無順旨有來佩此  
當韋弦庶免浮塵澗山水

宋林洪

三聘慙慙起富春何如一宿便辭君早知閑脚  
無伸處只合青山卧白雲

宋馮哲夫

虎帳登床雙脚赤羊裘籠袖兩眉龐公孫禡帝  
囂登馘只有先生不得降

遷賤雖同別後殊江湖不改舊時吾掉頭不是

交情薄要與君王立懦夫

宋劉晉之

扁舟獨上子陵灘一片秋烟萬疊山自笑塵緣  
何日了此身同寄水雲間

宋汪義榮

四皓逃秦終翼惠伯夷避紂亦歸文先生豈是  
忘君者最有扶持漢鼎勳

宋吳生

富貴都歸一釣竿高風贏得古今看雲臺冠冕

須臾事不及羊裘耐歲寒

宋舒林

黨錮諸賢死不回東京風節此公開支持三百  
年天下不是雲臺是釣臺

宋項安世

林闌山頭破草亭只須此地了平生崎嶇狹世  
纔伸足又被劉郎賣作名

君房足下竟成諛只有韓歆已破除豈有江湖  
釣竿手與君臺閣奉文書

宋程準

臺在雲端路自平却嫌世路不堪行高臺豈為  
釣魚設要與人間學避名

宋呂人龍

釣臺還是先生物洛汭今非漢帝家過客不知  
興廢事又馳車馬入京華

萬古寒潭數曲山紅塵不到白鷗閑先生自是  
生涯淡却厭浮雲滿世間

宋孫嵩

江上綸竿萬慮空東都誇節許誰同如今榮利  
千鈞重但覺人間欠此翁

嘆息唯君有故人羊裘蕭散不須臣幾千年後  
重來問水馥山芳迹未陳

歌行

宋馬存

子陵臺下山層層奇峰壯氣橫雲生子陵灘下  
水泚泚碧波明月涵天青老松偃蹇傲世色脩  
竹瀟瀟吟風聲潮頭百仞出海門飄吳擊越如  
毛輕飛來灘下不敢過變化平浪歸滄溟

宋張鉉

絳衣騎口扶桑上三精九縣開靈貺趙梁雍代  
跡俱空馮吳冠鄒勳相望客星何處潛光芒雙  
臺疊巘摩穹蒼釣絲千丈捲烟雨俯瞰一碧波  
繫江羊裘坐穩無心動滿輪纒幣如何用故人  
聊為小周旋君房謬欲相推送寥寥歲月今幾  
秋山寒松吹多飈飈春來日暖花氣發極浦浪  
轉魚龍遊先生有臺人共高虛庭恐見生蓬蒿  
斷碑敗壁蠹荒蘚灌木野鳥指枯巢一朝鍾梵

交雲際簷楹改觀輝杉桂非關好事取時名此  
中耻但稱能吏却經祠下羅青鐫試歌此詩當  
招魂先生出兮佩蘭蓀明璣耀旂駕瑤璠黃麟  
道前翠虬奔先生去兮山雲屯玉妃金童從續  
紛吹簫鼓瑟聲冥冥目斷暮鶯棲遠村

宋潘中父

焚坑禍作逃園綺明哲保身寧餓死溺冠嫚罵  
又一春織畚鼓刀恬不耻子房托疾封留歸齊  
魯大臣那可知此意寥寥二百載阿諛往往居

帝師中興天幸有光武下士謙恭冠千古布衣  
本以道義交不問故人登九五竭來過我路幾  
程征衫猶作戰血腥睡餘伸足稍加腹安得細  
事閑天星歸與空審苞桑戒勿念潔身增嘆慨  
君持柔道理乾坤我把絲綸老湍瀨

宋程俱

我思一人去千載乃在越角水之東旁人指山  
名釣臺下視九土氛黃埃投竿百牯何足道直  
拂三昧挂瑤草彼一人兮皎獨立清風為神水



為骨羊裘蒙葺溪山旁大勝被衮升明堂劉秀  
發兵誅不道氣壓昆陽纔一掃登床撫腹坐太  
息始信赤符非至寶我今掛帆七里灘瞻拜岩  
岩千仞臺神遊八極夢髣髴但覺萬古松風寒

宋魯丰

周家刑不上大夫法固不足禮有餘何人不願  
立朝路未老誰肯甘田廬秦坑學士寘勿論漢  
嫚大臣眡如奴逸民不出朝士去前有兩生後  
二疏世祖聰明失之察待臣少禮多以法當時

祿位列三公危似千鈞懸一髮先生識帝貧賤  
時富貴共之理所宜云胡君房留不住無乃平  
日窺其微龍顏之踈顧豈忍烏啄所伏那可矧  
初來高蹈疑矯世從後逆觀信知幾退身不勇  
公孫賀明泣危機終自墮先生明甚勇如之天  
地萬物莫吾挫將星群立客星孤群恐難調孤  
易禍帝坐旁邊睡熟間夢魂已在桐江卧將星  
耿耿亘今明不似客星明更大

宋盧驥

無欲戴蟬冠  
蟬冠械人盼  
無欲披袞衣  
袞衣囚  
我身貧賤自閑暇  
功名多苦辛  
君不見大將軍  
功蓋天地一朝餓死園墻裏  
又不見穰侯貴  
壓咸陽都朝為公卿  
暮匹夫爭如春風秋月一竿  
竹萬古溪山看不足  
勝他宮殿鎖千門  
細草清蒲為誰綠

宋楊時

君不見釣璜溪上白髮翁  
一竿西去追冥鴻  
畋車載得非熊熊  
鷹揚烈氣如飄風  
又不見羊裘

石瀨垂綸叟  
爽氣凌天動  
星斗萬乘故人親訪  
求卧對臺輿  
忍回首聖賢  
遇合自有時  
紫身亂倫非所知  
高風寥寥古已往  
較然得失知者誰

宋范興祖

太公直鈞釣尚父子陵  
無鈞釣高名周文漢光  
取賢哲名書信史炳丹  
青我下祠下賞烟景森  
森古木搖山影  
至今灘下瀉清聲  
千古高

風常  
不泯

宋易嘉猷

夜泊七里瀨  
萬感集我懷  
漢家社稷無寸土  
千

載猶存子陵臺又如雲臺功臣繪二十八像安  
在哉乃知富貴暫熱止可耀一世不如林下一  
節萬古常崔嵬借使子陵肯為文叔仕也隨餘  
子埋沒飛塵埃江邊席地至今屬儂有而况名  
與江流日喧阗人生富貴戒危溢急流勇退真  
奇才二疏乞骸而謝事公卿祖帳東門開淵明  
在官八十日于今仰慕歸去來大書特書照青  
史回視若輩應哈哈貪榮嗜利為已累不知止  
足滋癡歎頓蝨躋什已可笑升高墮死猶可哀

宋吳升之

春陵劉文叔一旦乘六龍二十八將催行封顧  
我乃無橫草功豈肯以我為三公又况古人相  
逢有吉凶一官若出侯霸下何如且在漁樵中  
君不見董賢先為大司馬人主幾於禪天下俄  
傾身亡家亦亡學語小兒猶唾罵爭似先生貴  
岩穴不為世情移晚節桐廬江上石盤陀萬古  
高名懸日月

宋陳黼

人閑得安眠夢斷了無欲那思趨朝士一馬百  
夫僕况聞稻苗盛昨夜新雨足一飽如可期吾  
事豈多目巖山鬱葱猜流水周其麓照我本來  
面真白非浴鵠故應此間住却掃便違俗趨然  
寂獎中無往亦非復百年只爾耳行矣無躑躅  
區區欲何為世路羊腸曲

宋江蘧

有客抱微疴歸期思無那駕舟子陵灘心閑愁  
亦破先生輕勢利高尚雲崗卧木繁秀可食淥  
浮不可唾爽槩千仞齊高風萬古播薄夫為之  
厚貪者為之墮悠悠名利人有覩不忍覩

宋葉適

夜下東館水朝指富陽城西風苦留人登臺濯  
塵纓祠古霜漠漠江寒鳥冥冥漢家同學子遭  
亂久飄零聞仗司隸節重致寒宇寧坐收江湖  
盜冠劔陪天庭艱難問夥涉不得歸傭耕平生  
堯舜學讀識已稱平哀哉忍為利偃卧全放情  
脛伸偶及腹忽已占天星遂歸富春山釋來騎

長鯨得名泰山重辭爵秋毫輕池臺荷愛惜碑  
板更晦明蒼然松桂姿永與雲月并頗憐瀨下  
魚挂餌以自烹詩家今潘翁語妙專千齡古音  
未易識豐山為誰鳴

宋滕岑

潘皖有詞伯多聞兼直亮早歲仕吾州頗類次  
山浪嘗為羊裘人作賦釣臺上摹寫溪山勝形  
容出處狀一有巢由節一無堯舜量詞意兩絕  
竒筆力甚宏放如何世罕傳文與俗異尚豈料

公暮年來為此州將陸侯為立石舊跡始尋訪  
知君為賦詩有識知尊嚮身後遇知音令

我一悲愴

宋朱承孫

漢運厄陽九播紳鮮忠亮持祿皆脂韋肯泛五  
湖浪符命諛偽新詎復懷君上史編存直筆備  
紀不臣狀巖巖巖夫子宇宙恢洪量爵秩鴻毛  
輕壯懷任曠放羊裘傲歲寒清節推高尚垂綸  
泉石間藐視雲臺將聞風百世餘遺跡可搜訪  
英賢踵發揚士類識趨嚮誰能興九原此

情第悽愴

宋方岳

落帆鷗鷁步倚策羊裘軒紛披穉篠間森鬱古  
木繁幽蹊石齒齒醉袖風翻翻緬懷臺上人老  
蘚雙趺存寧知天九重不博月一痕咄哉侯君  
房坐受富貴吞先生無乃誤肯與癡人言吾詩  
亦贅矣眠舌不可捫

宋錢拱辰

先生應詔起一宿動星辰浮雲輕富貴屈道肯  
伸身高風真可仰清節孰堪倫山河經幾主不

屬漢雲仍先生有釣臺千古名存雲山青不  
改江水自晨昏感古興長嘆招魂寫誄文

宋葉適

舊聞子陵垂釣處漁父不在餘空磯漢家鯨鯢  
盡鼎祖尚有短尾隨脩絲江山醞籍到今日草  
樹茂好逾昔時枕師不許吾欲往風水相得終  
矣為

宋蔡枏

高臺百尺凌空碧維舟夜久霜月白瘦木岑岑  
搖枯藤寒瀨潺潺落蒼石先生退隱知幾年漢

家鍾鼎徒凌烟高風千古磨不盡山水照映長  
明鮮我來俯仰慚羈旅衝寒愁怕玄冬暮此身  
不負白鷗盟暫此遲留亦何預起來搔首江茫  
茫孤篷却逐鴈隨陽人生遊行豈易得惟有此  
夕難相忘

宋陳謙

欲上釣臺上常憂力不任已登最高處足愜平  
生心巨石作基址清風無古今自憐篷底客來  
此一披襟

宋姜叔永

繫身不把釣傲世豈圖形雲裏尋真隱林間見  
此亭鷗群歸水麓人語在烟屏尺五天非遠何  
妨酌客星

宋潘時

不到危臺久重來恰十年壯懷今掃盡遺像只  
依然老我從踈拙微官合棄捐歸來營釣艇來  
此卧風烟

宋徐照

當時廊廟去此地也成空草木多年換兒孫近  
代窮無言傷末俗久立慕高風梅福神僊者新  
知是婦翁

宋楊直清

着脚雲林上先生豈釣名人誰超世網我自愛  
灘聲鍾鼎嗟逾重衡茅可自輕群公了時事羸  
得獨歸耕

宋羅汝楫

屹屹君家舊釣臺臺前祠屋半傾頽掩關故有

殘僧在停棹知無俗子來欽想清芳垂竹素忍  
令高躅就蒿萊兼工料理由違裔我願乘流醉一盃

宋嚴康朝

槎牙古木鎖雙臺往事渾隨歲月頽獨有清風  
振今古愧無高躅繼雲來故家已許終身復奉  
祀虛聞百畝萊崛起危簷驚世俗史君不是為御盃

宋謝邁

羊裘不見釣臺傾水到臺邊分外青天上故人  
新黼黻身前萬事一冬筭章侯筆法逼秦相范



子文章厚易經圖畫名臣久磨滅此禪千古繁星

宋鄧元

青衫傲吏竟誰傲白首歸田安用歸酒信英雄  
爭兩立不然富貴摠相依故人得國九天下處  
士逃名一釣磯真隱真王各千載滄浪寒籟滿烟霏

宋姜叔永

異世相約上百尺臺過舟誰不共徘徊山川不改  
舊奇勝日月于今幾往來遺像雖存千載祀高  
風莫挽萬牛回哦詩得句須還李乞與幽人病眼開

宋袁聘儒

直使貂蟬尚辱公隱居豈為激顏風漢家既已  
封諸將海內那能看兩雄贏得一身游鹿豕枉  
令後世駭兒童英豪心事知誰會江水雲山杳莫窮

宋黃茹之

空使人間訪客星羊裘不博袞衣榮高名全節  
子今誦斷岸懸流到底清九鼎已增炎系重一  
鈎未覺釣絲輕偶來尋覓遺蹤跡又見漁燈貼岸明

宋陳倫

人言漢德在民深不把鴻嘉往事尋撥亂除煩  
天子聖起廉立懦老臣心長陵一旦無杯土峙  
鼎雙隅尚歛襟始信先生遺德遠桐江嚴瀨竹  
森森  
功名竹帛半張紙富貴丹青一綫流故舊小臣  
天子友嶢岵單隱野人遊孤峯午夜消明月亘  
古寒潭捲碧秋怪底紅塵何處客特來祠下纜  
行舟

宋錢錡

昔人垂釣今何在此地空餘百尺臺山上浮雲  
舒復捲江中潮汐去還來昭昭令譽垂千古耿

耿清風播九亥回視壽陵何處是夕陽翁

仲目  
蒼苔

宋楊潛

遐想當年隱富春生涯只寄一絲綸幸逢白水  
為真主肯向青山訪故人試問勒功依日月何  
如占象動星辰回頭四七皆塵迹獨有先生迹  
未塵

宋方有開

先生玉立伴玄英心與冰壺兩閉明已把羊裘  
甘聞寂肯隨龍袞耀光榮名扶漢鼎千鈞重風  
激巖灘七里清試向漁磯問蹤跡白雲深處綠  
簾輕

宋錢隱之

來往輕舸不暫停誰人識得子陵心浮雲富貴  
從興廢釣石清高自古今流盡年光嚴瀨水喚  
回塵夢富春禽客星無復瞻光采惟有空山月  
滿林

宋胡師中

世祖龍潛有故人甘心肥遯此垂綸當年物色  
空尋訪今日聲名愈覺新人是人非都不染潮  
生潮落莫知春英雄衮衮雲臺上爭似先生釣  
水濱

宋周弼

晴江漾漾綠波來惆悵君房去不回秦苑山河  
歸故國越鄉風雨閉荒臺春風一道江籬長落  
日千峯社宇哀欲訪釣舟無處所野花如雪滿  
汀開

宋來梓

隨宜也要近長安寓地無嫌泊釣灘驕氣正餘  
秋後熱爽風徐變夜深寒逆知自有乾坤寄尚  
可相依日月寬脫或未然聊爾耳東湖無浪碧  
根坪

宋錢竹間

寥寥東帛起江濱一見天顏喜不勝同寢頓忘

天子貴相親惟念故人情懶追伊呂興王業寧  
學巢由遜姓名不是漢光天地量客星那得到

宋蘇十能

江水粼粼碧雲山疊疊奇平生心事一鉤絲便  
是壺中日月更何疑○文叔今方貴君房素自  
癡洛陽塵土浣人衣爭似歸來雙足踏漣漪右南

宋朱熹

不見嚴夫子寂寞富春山空留千丈危石高出  
暮雲端想像羊裘披了一笑兩忘身世來師釣

魚竿肯似林間翮飛倦始知還○中興主功業  
就鬢毛班馳驅一世人物相與濟時艱獨委狂  
奴心事未羨癡兒昂足放去任踈頑爽氣動星  
斗終古照林巒右水調

王自中

扁舟夜泛向子陵臺下偃帆收櫓水闊風搖舟  
不定依約月華新吐細酌清泉痛澆塵臆喚起  
先生語當年綸釣為誰高卧烟渚○還念古往  
今來功名可共能幾人光武一旦星文驚四海

從此故人何許到底軒裳不如簑笠久矣心相  
與天低雲淡浩然吾欲高舉

右調醉  
江月

宋林式之

桐臯東去又依然烟際兩邊柔櫓賴有雙臺知  
已耳牢落孤懷欲吐小倚雲根細商心事提起  
千年語九天飛夢別來長記幽渚○試說北海  
歸文西山何事獨不甘臣武廣大竟天箕穎小  
綿上可能如許舉世真癡先生長嘯塵海誰堪  
與嘯聲吹送刺天鸞鶴冲舉

右調醉  
江月

宋沈剛孫

我來訪古把塵襟都付一聲鳴櫓笑把瑤觴波  
浩蕩却憶長鯨吞吐坐挹高風骨清毛冷不作  
囂塵語客星何在謾留遺像江渚○試問澤畔  
羊裘當時何事笑禹弁官武金印貂蟬誰不愛  
只為汗頑巢許幸有高臺較他箕穎未肯輕輸  
與酒酣長嘯翩然誰共飛舉

右調醉  
江月

宋陳安行

重過釣臺路風物故依然羊裘軒上俯臨清泚

面辱顏仰見先生風節更有兩公石釣冰雪照  
人寒龍野方馳逐鴻翼自孤騫○酌壺觴追往  
昔笑華顛別來三紀推排曾戴侍臣冠慚愧忘  
恩難答聊復守符重綰敢嘆客途艱少報某年  
政行泛五湖船

右水調  
歌頭

宋曾中思

有客泛輕舸迤邐到桐廬山灣水曲箇中依約  
似山區試喚清江漁父為問來今往古興廢事  
何如笑指寒烟裏此是子陵居○漢光武興

連瞿乾符客星侵座方見不與故八跡自是先  
生高尚無限經綸才略飄泛寄江湖凜凜亘千  
載風月屬樵漁

右水調  
歌頭

黃子初

綰緯釣臺下歛衽謁嚴陵石磯封蘚一笑挾策  
獨先登山獻脩蛾幾抹江遠青羅子頃今古富  
春聲行有二三子心蹟喜雙清○羊裘追往  
躅尚儀形丹青洒落三反誰動紫垣星重袖調  
元大手歸傲綸竿一線志不在寒鯨千載仰風

節鴻鵠自冥冥

右水調  
歌頭

宋張嗣初

名節本來重軒冕亦何輕人間見戲剛自指點  
客星明黃屋龍旂九仞蒼石漁絲千尺誰辱又  
誰榮會得儻來意方識古交情○想當時奇男  
子漢真人龍潛豹隱骨中同是一經綸公辦中  
興事業我向滄浪學釣各自寄吾真誰信往來  
客千古誦清名

右水調  
歌頭

宋范成大

浮生有幾嘆歡娛常少憂愁相屬富貴功名皆  
由命何必區區僕僕燕蝠塵中鷄虫影裏見了  
還追逐山間林下幾人真箇幽獨○誰似當日  
嚴君故人龍衮獨抱羊裘宿把漁竿都掉了百  
種千般拘束兩岸烟林半溪山影此處無榮辱  
荒臺遺像至今嗟味不足

右調  
江月

宋沈明叔

漢事正猶豫足迹聽楚然嚴陵老子當時底事  
動天頑曾把絲綸一擲藐視山河九鼎高議凜

人寒竹帛非吾事霄漢任騰騫○問雲臺還得  
似釣臺巔幾年山下使人猶識漢衣冠寄語功  
名餘子今日成塵何在百戰亦多艱一笑桐江  
上來往釣名船

右水調  
歌頭

宋鄭庶

千古釣臺下老虛去喪人倚空絕壁朝暮秀色  
只如春高掛瀑泉十尺洗到雲根山骨無處着  
凡塵秋盡玉壺冷別是一乾坤○問當日中興  
將漢功臣雲臺何在寂寞誰復記丹青爭似先

生標致長共清風明月不減舊精神無限興亡  
意舒卷在絲綸

右水調  
歌頭

宋程準

并繫釣臺下身寄碧雲端骨中千古風月筆下  
助波瀾喚起羊裘仙魄來伴蟬冠清影星閣倚  
闌干上想中興事名節重於山○濯滄浪開玉  
鑑照朱顏平生多少英氣直欲斬樓蘭盡道詩  
書元帥好作經綸上袞勲業炳華丹霄漢展鸞  
翼雷羽震龍蟠

右水調  
歌頭



宋方有開

七里灘邊江光漠漠山如戟漁舟一葉逗入寒  
烟碧○笑我塵勞羞對雙臺石身如織年年行  
役魚鳥渾相識右點絳唇

跳出紅塵都不顧是非榮辱垂釣處月明風細水清  
山綠七里灘頭帆落盡長山瀧口潮回速問有誰  
特地上鉤來劉文叔○貂蟬貴無人續金帶重難  
拘束這白麻黃紙豈曾經目昨夜客星侵帝座且  
容伸脚加君腹問高風今古有誰同先生獨右滿江紅

空山木落月淡闌干角相與羊裘堂上方知道  
宦情惡○老來須自覺酒樽行處樂疑到碧灣  
無路灘聲小槽薄右調霜天曉角

劉原

幾載滄江夢此夕復經過雙臺對峙如畫空翠  
滴晴波不是先生高節激起清風千古漢鼎復  
如何矯首望天際烟樹翠婆娑○危樓下數不  
盡去帆多人人驚肉生髀却日欲揮戈誰識磯  
邊泉石別有壺中天地烟雨一青蓑自笑亦華

髮三嘆吊巖阿右水調歌頭

林實之

客星堂下水碧浮空烟樹幾重重想故人當日  
論情蓬藿際會雲龍底事泥塗軒冕不肯作三  
公千仞釣江許此意誰同○應笑赤松黃石效  
癡兒成事猶自言功怎知他箕穎袖手獨春容  
幸風月有人料理自家山叟與溪翁鳴榔晚一  
聲長嘯相送冥鴻右八聲甘州

元張養浩

一葉舟輕雙槳鴻鷺水天清影湛波平魚翻薄  
鑑鷺點烟汀過沙溪急霜溪冷月溪明○重重  
似畫曲曲如屏當年虛老嚴陵君臣一夢今古  
空名但遠山長雲山亂晚山青右行香子

周權

東都熱官手可炙吳儂面似秋江色平生落魄  
一羊裘七葉貂蟬不堪易功臣盡在雲臺中丹  
青化作塵埃空先生遺像只在此釣竿尚裊桐  
江風悠悠世事江雲白過眼輕帆自朝夕人間

萬古仰孤風，天上有星猶是客。

趙孟頫

悠悠空山雲泱泱，長江流廟廊。意不屑山澤，聊淹留故人在天位。高步追巢由，豈曰子無衣。辛苦披羊裘，東京多節義之子。乃其尤窮居，雖獨善輔世，豈不優。

貢師泰

江流浩蕩石嶺屹，千里來尋一日閒。慚愧白頭奔走客，題詩也到富春山。

百戰關河血未乾，漢家宗社要重安。當時畫着羊裘去，誰向雲臺畫裏看。

薩天錫

雙臺屹立幾千仞，下有一葉之孤舟。繁星亂垂光燁燁，長藤古木風飈飈。荒祠幽黑山鬼集，在石如人水邊立。錦峯繡嶺雲氣深，萬壑千年露華滴。山僧對語夜未央，不知風露滿衣裳。喚舡振錫渡江去，林黑無由歸上方。高塞宇宙無人語，亂石灘聲洒飛雨。欲從巖子借羊裘，坐待舡。

頭山月吐

趙奕

君因鄉相隱我爲利名來羞見先生面黃昏過  
釣臺

徐舫

子陵何爲隱漢爵不肯受天子下皆臣獨稱天  
子友平生一羊裘甘作烟波叟迨今雙臺石高  
風清宇宙夫何釣者徒千古祠弗朽烈烈雲臺  
功丹青今在否

元黃鎮成

桐江兩石臺屹立萬仞高昔日羊裘翁長緝釣  
秋濤雅志不在魚白首蹲江臯誰知九重翁乃  
是舊同袍故態不可除林泉終邂逅睨彼軒冕  
崇乾坤一鴻毛泊舟滄江側捷步追猿猱下窺  
流水清仰睇風雲豪崇祀庇林麓千載猶君高  
懷哉古人風江流日滔滔

元劉因

文叔雖天子因陵位愈尊爲陵成高節此亦天

子思兩星應千古精爽如尚存有此謹厚者可  
贈狂奴真巢由本不輕恠妄徒擬倫中庸又蕪  
沒矯激非天民惟餘仁義語至今凜若新想像  
富春日崔嵬猶起人

元金履祥

誰云孟氏死吾道又無傳我讀子陵書仁義獨  
兩言仁為本心德義乃制事權懷輔存體用治  
亂生死關乃知嚴先生優到聖賢邊歸來釣清  
江夫豈長往人漢道終雜伯文叔徒幾沉何如

對青山俯仰自油然我來一瓣香敬為先生拈  
陟彼崔嵬岡想此仁義心儼若羊裘翁縹渺暮  
雲深

西望先生舊釣臺無窮山色鎮崔嵬閑歸故里  
更春雨遂起頽風生暮雷萬事盡隨江水去千  
年能幾客星來北山今有何夫子不入經

蓮亦草萊

元許謙

盜莽絕矣運虛焰煽方熾英雄各懷忠韜匿有  
所遲真人一呼問風雨浩無際浮埃掃妖孽盤

石奠神器先生澹無欲耕釣聊避地俯首千仞  
岡一莞群士戲故人正九五樂與共天位棟梁  
及榱桷堂構亦粗備龍遊白雲鄉美秦寧受繫  
事君當盡禮豈不熟茲義胡為夜牀足加腹罔  
敬忌羊裘有何樂若是志乃遂高節全一時幸  
利自百世桐江渺舊遊山水貯清氣升堂挹餘  
風塵心等蟬蛻

元楊維禎

子陵江海客本非沮溺倫仁義立竒論豈果忘

吾民狂奴作故能飄然歸富春客星犯帝座大  
史成天文故人信符讖三公等浮雲

元范梈

吾慕嚴子陵隱居富春山故人乘六龍身隨魚  
鳥閑羊裘大澤雪在鬢忽來導從入皇都掉頭  
不受諫大夫高風逸節何代無慎勿滄浪輕釣徒

元鮮于樞

霜髮孤舟客風帆七里灘漁家江樹晚鴈影水  
雲寒鄉近人情好年豐老慮寬歸舟真誤矣何

事着儒冠

元胡炳文

鴻飛冥冥不可弋當時肯入被羅中暫往自為  
故人屈竟歸不與子餘同眇視富貴意誰識大  
閔名教功奚亨近來士氣頗卑懦艤舟祠下歌  
清風

元陳野雲

雲合雲從四七豪冥鴻不受綠羅包委身若使  
儕馮鄧亢節何由到許巢一足故人星宿迫片

心清聖水雲交釣臺凜凜高千古回首雲臺覓  
夢泡

元胡初翁

南陽真人有天下東都大業猶閑中山澤釣耕  
不啻足巖廊敞納將無同鴻羽為儀世共嘆龍  
德而隱天何窮九鼎乘除可堪數漁歌未斷秋  
江風

元戴良

萬丈層崖置屋牢子陵塚墓歷靈龜繞庭雲氣

皆山雨滿壑風聲是海濤  
隱德音煩天使下祠  
光今並客星高  
回頭却憶當年事  
幾度春陵鬼  
夜號

元俞師魯

漢官威儀如舊日  
先生羊裘釣澤中  
東都名節  
從此始雲臺功烈  
何能同  
寒流殘照見天末  
危  
日脫木驚秋穹  
惜哉登臨迫行役  
負此千載桐  
江風

元胡虛中

已幸六龍在天上  
勇辭談議歸山中  
懦夫立志  
固有自度士  
盜名元不同  
雲寒山青巖瀨古  
潮  
生鵲沒吳天  
穹四息辭訣死  
直諫客星始信真  
高風

元揭傒斯

何事玄纁入里閭  
羊裘暫脫入安車  
空令太史  
驚同寢猶把狂奴  
視報書一出聊為  
天子重諸  
公莫道故人踈  
朝廷自足中興士  
且放桐江看  
老夫



元張翥

兩臺有逕可躋攀老樹長藤蒼蔚間漁釣自忘  
天子貴風雲何似客星閑鍾催夜月來孤寺帆  
挾春潮過亂山寂寞羊裘軒下落幾人携酒酌  
潺湲

元王叔明

雲臺圖寫中興功豈識羊裘遁世翁天上有星  
侵帝座人間無地獵飛熊一竿釣雪誰堪比九  
獐連鰲志不同寂寞兩厓懸日月徒令千古播

高風

元趙孟頫

桐江水色映青山安穩行人掛布帆回首風沙  
鞍馬裏不知此地是塵凡  
富春山中有客星辭榮歸來意更真羊裘坐釣  
滄波上却笑劉郎非古人

元成脩堂

節義功名總不輕南宮圖像炳丹青如何只畫  
風雲將不畫桐江一客星

元貢師泰

青山如馬復如龍  
滄海東來第幾重  
不是狂奴輕萬乘  
世間誰不受牢籠

元呂鳳山

自分清濁倚天開  
一字無人譽釣臺  
底事品題今滿壁  
先生曾把釣竿來

文叔親呼眼不開  
已應魂夢倚高臺  
好山好水好風月  
合放先生歸去來

兩人曾共一燈青  
後會如何犯帝星  
過客有懷

無處問青山  
伍伍水泠泠

不是逃名去不還  
也非沽譽愛高攀  
暫來還去無拘束  
道在清和二字間

舊物還他舊時王  
故人堪老故山樵  
後人要識閑中趣  
山上浮雲水上瓢

不緣安穩不須高能止  
頽風息怒濤莫道後來  
無好手文星還與客星高

元錢君佐

相逢一宿眼  
充青大史朝來奏  
客星不是量同

天地大肯容江水釣冷冷

不事王侯去又還清風高節有誰攀  
夷齊甘受西山餓可與齊名字宙間

芳名耿耿不銷沉自漢流傳直到今  
臺下往來名利客誰人學得子陵心

元錢君瑞

臺下遊人猛着篙一絲穩把任風濤  
後來若使投竿起那得名同釣石高

嚴灘浪裏釣絲垂莫道先生事業微  
漢室瓜分

今已夕月明尤自釣漁磯

自愛雲山了此生歸來不念故人情  
一竿風月甘閑釣贏得嚴陵萬古名

元無名氏

范蠡忘名載西子介推逃迹累山樊  
先生正爾無多事聊把漁竿坐水村

先生久矣抱清名七里灘頭釣月明  
富貴若教頻着意漁叢焉得老平生

晦迹韜光不計春怡然養道樂天真  
一竿臺上

清風遠肯為中興作漢臣

元楊樵雲

一炬中天炳客星稜稜風節尚如生清名振世  
千鈞重好爵當時片葉輕

元孫嵩

江上綸竿萬慮空東都持節有誰同如今榮利  
千鈞重但覺人間欠此翁

嘆息唯君有故人羊裘蕭散不須臣幾千年後  
重來問水腹山芳迹未陳

元程鉅夫

先生只合桐江老幸有生涯釣與農偶被羊裘  
勾引去客星早已不相容

元王恽

都俞無幾已還山自笑瞞跚老一官為恐石壇  
松鶴笑夜深舟過子陵灘

元張憲

天上故人赤伏符羊裘大澤隱狂奴絕憐一線  
桐江月不換當年諫大夫

元錢無

一見故人歸去來，漁竿不肯博三台。  
漢陵今日無杯土，惟獨先生有釣臺。

元康里巖巖

子陵才業高千古，當使君王入夢思。  
漢祖規模只如此，惜哉堯舜不同時。

元錢芸憲

尚父投竿渭水濱，先生何事獨垂綸。  
應知濟世多英傑，懶下高臺謁紫宸。

元胡植芸

老樹顛崖浸碧沉，清風凜凜到如今。  
臺前咫尺紅塵路，無柰高人不動心。

元錢天德

雙心窺峩瞰碧流，高名不朽古今留。  
平生亦有烟霞趣，欲學先生把釣鉤。

元舒益庵

自從盤古兩儀開，便有峩峩兩石臺。  
建武以前誰着眼，高名起自子陵來。

元錢肯堂

客星閣下碧流長兩岸清風起綠楊覽古今人  
成感慨旋斟掬水平嚴光

元黃潛

四山環一水遺臺故嶺屹那無漁樵居政復不  
敢安舍舟衝微雨憑軒俯清灣念昔乘興來無  
從寄遊觀今我有行役乃爾容躋攀山靈豈愛  
我為解塵土顏落日莫蘋藻清風聞佩環幽尋  
不可及林暝吾當還却去望層碧孤舟生晚寒

元王惲

至元十六年己丑歲冬仲九日予自桐廬舍鞍  
鼓柁取道嚴瀨既午艤舟祠下登拜遺像肅如  
也歷觀古今題記多論其形迹未有明先生之  
心者天下有二道出與處而已先生之起義明  
君臣順乎天也浩然長歸氣信明節遂其志也  
夫三公坐而論道思明是理而表萬方者也是  
則佐理之功多矣尚何為哉因留詩招隱柱間  
入客星閣眺羊裘軒降觀釣臺書院山光叢簇

江流有聲若有以回俗駕而謝逋客也江行有  
程促之而去回望雙臺顏厚有忸

劉卽少年同几席繡裾朱衣稱謹勅六龍一日  
飛上天豈為故人談往昔原陵欲臣意有在大  
隱何心學夷隘當時雖落物色中肯以三公易  
其介先生豈是烟波徒奕奕星芒動帝車一言  
稍峻得狂鄙况復好爵糜其軀君臣大義已明  
了助順又見懷仁書君房初不識微意尚欲求  
益何其迂一竿雖老桐江月儘着清風勵薄夫

國朝劉基

伯夷清節太公功出處行藏豈必同不是雲臺  
興帝業桐江無用一絲風

高啓

羊裘翁遺釣臺蒼翠兩相向勢厭千崖鬼境嚴  
峭壁聳雲表下有泱泱桐江流東望滄漠不復  
迴清風在茲振千古唾視輕冕浮輕埃心懷高  
潔猶可覩時吐片月峰頭來釣臺之高何如哉

楊榮

炎祚中興群賢滿朝懷哉故人寧不可招煌煌  
客星有光天府羊裘釣絲清風千古

張以寧

故人已乘六龍去君獨羊裘釣月明魯國大名  
垂宇宙漢家小吏待公卿天回御榻星辰動人  
去高臺山水清我有長竿數千尺坐來東海看  
潮生

莊昶

東漢雲臺迹已休萬年風節在羊裘西來定是

桐江水不共漳河一處流

王偁

高臺薄層霄仰視烟霞深羊裘昔何爲遺身在  
雲林漢宮久荒涼霸業成古今飄飄釣臺絲尚  
爾清煩襟幾年倦羈旅扁舟宿溪潯折芳欲有  
酬洒酒絃素琴臨恍中夜霄漢星光沉

方孝孺

敬賢當遠色治國先齊家如何廢郭后寵此陰  
麗華糟糠之妻尚如此貧賤之交安足倚嚴陵



老子先見幾故向桐江弄烟水

王皆山

新室募炎祚中興復與圖故人即軒冕先生獨  
樵漁一出盡交態拂袖歸桐廬豈惟黃綺輩得  
與巢由俱我來訪遺跡高臺但荒蕪洒酒酌千  
古悲風起天隅

商輅

拂袖長歌入富春滄江深處獨垂綸短策不換  
軒裳貴千載高風有幾人

金寔

高情厭浮榮有懷在滄浪古人乘六龍赤符正  
煌煌冷風盪穢氛明離協重光諫垣豈無人素  
心不能忘龍節照江水鶴書貴松房明庭抗殊  
禮中躔動天章雲臺多元勛宗社亦已康長才  
既無施卷道惟深藏微波可垂綸溪谷宜開荒  
匪伊嗜修鱗亦豈謀稻粱輓跡埃壒餘寄心水  
雲鄉誰云羔羊裘不復如軒裳清風亘寰宇荒  
磯屹崇岡落日重懷古山水空滄茫

朱湮

山前歛朝霏山後重陰黑地勢自爾殊天道元  
不隔茫茫七里瀨洪濤聲盪激烟開別墅青風  
捲寒浪白狂疑天柱折怒訝神輿側安知九淵  
下不有蛟龍宅登高薄層岷吊古追往昔緬懷  
建武初嚴陵釣斯澤遐哉樂肥遯傲睨天地窄  
依依動宸眷四海同物色祥麟與神駿寧將受  
羈勒客心久潛駭江上空陳迹羊裘渺何許漢  
運尋已訖惟餘范公祠千載留真石

談綱

九鼎悠悠重一絲天星犯帝事堪疑看來此語  
真讒謗不在區區美巧詩

楊琅

荒臺渺何許萃葦空山隅緬彼垂釣人取適豈  
在魚清風塞六合名與天地俱懷哉不可見佇  
立空躊躇

張恂

勳列雲臺爲漢收先生風節冷颼颼桐江江下

清清水千尺絲綸把釣鉤

自着羊裘不惹塵富春山下足容身漢廷天子  
忘尊貴海宇咸歸讓一人  
七里灘頭去復來千年高節子陵才我非名利  
場中客羞見先生夜過臺

屠勲

高節扶炎鼎清風滿富春兩峰來轟轟一水去  
粼粼太史占星象平生有故人緬懷招不起獨  
立暮江濱

赤伏符龍運先生老釣裘故人空物色吾道祇  
滄洲洗耳巢由輩無心伊呂儔狂奴千古事此  
意復誰求

王守仁

憶昔過釣臺驅馳正軍旅十年今始來復以兵  
戈起空山烟霧深往跡如夢裏微雨林徑滑肺  
病雙足胝仰瞻臺上雲俯濯臺下水人生何碌  
碌高尚當如此

楊士奇

聖人撫昌運四海洽時雍閑對桐江水湛然心  
迹同懷仁以輔義百世仰高風

周進隆

山下危灘山上臺乾坤久待此人來誰知漢鼎  
千鈞重都在羊裘一着哉

釣臺識得勝雲臺物色空勞使者來試讀希文  
祠下記清風千古屬誰哉

萬古嵯峨兩石臺客星天上賦歸來碩廉孺立  
先生啓名教誰云小補哉



釣臺集卷之下

國朝徐尊生

不過子陵祠而今廿三年身世豈非夢而今但  
茫然扁舟又東去汎汎凌春烟中宵阻趨謁撫  
事悽不眠高尚亦有時嗟子獨能全清風苟未  
泯遺我還山緣

陸顛

漢帝握乾符千金聘巖光所重貧賤交富貴安  
可忘豈期各有志一宿辭君王舉足動星象馳  
名凜冰霜東歸桐江上羊裘自徜徉



國朝林鴻

維舟富春渚舒嘯登崔嵬不見羊裘人空餘垂  
釣臺苔色石上古秋聲松際哀清風猶可仰落  
日滿蒿萊

國朝蕭顛

停舟釣臺下千載憶前賢高名重今古夷齊應  
等眉波光時掩映山勢恒盤旋永與紫塵隔常  
共白雲眠清風滿六合狂瀾障百川不受天子  
祿獨釣桐江烟烟水聊寄興豈在綸與筌嗟我  
從薄宦驅馳三十年忠孝兩無補旦夕心慚然  
何如富春渚洗耳聽潺湲

國朝龔弘

子陵非忘君光武豈屈士恩重故人情所以成  
高致巖巖釣魚臺千載人不棄世稱隱者高吾  
儕仕何事當使平生心清端如水味一朝臨大  
艱忘身盡忠義清風與孤節隱顯同一器

國朝張孚敬

先生挺風節可為百世師茲余赴三召再拜先

生祠君臣有大義行藏復何疑此心不自昧有  
明主知光武本中興尊親固其宜如何考元帝  
終未明天彞先生烟水志此憾能無遺

國朝鄭善夫

咄咄嚴子陵竟不能下爾迢迢富春山潤潤桐  
江水渺渺窮居士皇皇漢天子當年布衣交一  
旦君臣禮渭川罷釣綸莘野釋耒耜上賢尊天  
瑞所願贊天紀若非魚水會徃徃委泥滓明主  
久不作吾道長已矣

國朝霍韜

老鶴凌寒川閃破長空碧歛翩傲松雲江魚足  
朝食何物南陽龍滾雲塞天黑攪動雲松影羽  
毛勞物色大澤非心性後儒徒論跡

國朝廖道南

江國訪孤蹤石瀨肆幽眺雲深石梁杳川迴嵐  
壁峭炎火載揚晶客星遂隱曜九鼎遺光榮層  
臺恣吟嘯浩涵山嶽靈冥契鬼神妙豈羨綺夏  
遊空負策由諂躬披一羊裘心期六鰲釣誰歌

希文詞堪並玄英調

國朝湛若水

吾舊嚴先生殊非巢許徒出處似合道為義匪  
為高賓友分已定從官何乃勞展足卧故人故  
態知狂奴欠伸動天象况乃人主乎惜哉帝王  
真大老歸江湖孰謂天地量徒見客星孤公卿  
滿漢庭紛紛索識圖

昔年過釣臺作詩憾光武乃不知故人諫議竟  
何取狂奴昧平生亦未以仁輔安得起先生與

之論出處有友如文叔安忍以相負而况天下  
君一正萬國度懷仁輔義言炳炳照今古人已  
性爾成合内外之道孔孟所皇皇人孰知其故

又

富春驛前春水明富春江上柳條生江籬滿目  
蔭簾綠幽鳥歌聲隔岸清孫氏雄圖逐水逝子  
陵高節與雲平舟中感慨懷千古悵望晴空虛  
翠屏

國朝李蓮湖



炎運方興漢魯連不帝秦披裘良有志附翼永  
難論釣跡猶臨水雲臺已作塵比肩巢由子士  
載愧無人

博羅林杰

卓哉子陵臺巉巖兩相對屹立柱中流孤高無  
與配羊裘一布衣潛身大澤內物色勞九重屈  
強甘自退目擊聲利場時事增感慨不徇故人  
情寧作狂奴態自有天地來君臣義不廢自有  
堯舜來巢由迹尚晦夷齊餓首陽曠世感百載  
生當孔孟時似非皇皇輩要之適其宜聖道豈  
云背清節重當時名教垂後代彼世務榮者諛  
說竟昏昧何如釣一絲流風千古在

莊一俊

夙愛丘中琴今懷祠下心白雲自不遠流水有  
餘音漢使圖空得客星座已臨故人留勝事書  
此在碑陰

林塾

分安不言利道大安有家桐江渡頭曲蕭蕭蘆

獲華釣臺開闢只如此客星帝座閑相倚先生  
目中豈但無故人却把羲皇等流水

劉球

雲傍春山卧星移御座臨羊裘披澤畔漁火照  
溪陰宦達千鍾祿栖遲一寸心君知輕與重獨  
釣碧波深

富春山高千萬夫子陵清節更高尚桐江水流  
今古同子陵清譽更無窮手持澤中一竿竹不  
顧人間萬鍾祿漢朝天子布衣

孫至都亭夜

同宿只動星躔天上頭肯將獸錦換羊裘身辭  
市朝去跡與鷗鷺遊春秋坐磐石晨夕瞰回流  
欲倡廉名激濁世投綵得魚等閑事當時薄俗  
頗還淳後日奸雄猶畏義扶持漢祚顛覆餘二  
十八將功不如滄桑屢易人世殊猶有高臺屹  
立溪山隅臺上風長清臺前月長白路人翹首  
但稱賢詞客登臨每留筆為邦有道尊先民今  
之太守吾故人作祠自擬范希文更將文字鐫  
堅珉試看萬古釣臺下雲水悠悠草木春

丘濬

長笑劉歆頭不及嚴陵足厥角稽首勢若崩况  
敢橫足加帝腹嚴先生何壯哉釣臺豈但高雲  
臺清風遼藐千萬古落日頽波挽不回

左贊

富春山色排雲翠桐江水聲日東逝釣臺獨占  
山水清千古令人想高致當時垂釣豈在魚山  
月江水真意味天上故人龍袞新江干自分羊  
裘故一朝物色到長安伸足終宵不成寐誰知

氣節動星辰歸來不羨圭裳貴故人六合以為  
家肯惜江南一磯地唐堯不奪巢由高巢由豈  
損唐堯治祠堂香火歲月深臨風細讀希文記

卞榮

一讀祠堂記仰止五千年今過祠堂下再拜意  
亦虔他人若識漢光武必在一朝登宰輔先生  
獨自看羊裘狂奴之態還如故凜然高節天實  
臨白日照見先生心釣竿一擲先生死客星冥  
冥烟霧裏坐令四海貪夫廉舍廉為貪誰个甘

彼甘貪者是何物狼吞虎噬餓狗饒仰瞻遺像  
若親覲一洗塵心如月白萬鍾九鼎又納賂何  
顏來立先生側有手莫折先生祠上樹樹頭有  
鶴孤棲處有足莫濯先生祠下水水深千尺清  
無底嗚呼而夫之甘貪者鍾乳三千兩胡椒八  
百斛不如先生釣魚之餌一粒粟軒爾享富貴  
終焉遭殺戮曾不如澤中逍遙一生足安得雲  
斤月斧伐石鐫我詩賞廉誅貪敢竊春秋辭祠  
前再拜放舟去那問先生知不知

陸相

富春山何崔嵬上有嚴陵之釣臺層巒疊嶽丹  
青開清風高節激萬古至今雙石對蒼苔羊裘  
本無心世俗徒見猜懷仁輔義王佐才狂奴之  
說誠詼諧客星一點亦天意先生蔑視軒冕如  
塵埃終令名節重漢鼎屹然砥柱狂瀾迴桐江  
清嚴灘平吁嗟先生兮不可見落日荒祠無限情

邵天和

炎精不墮光欲滅九鼎伊誰扶岷嶽英雄突起

草萊中何事先生獨高潔人疑諫議非小官我  
謂先生官不胥羊裘頗耐烟波寒豈必輝煌掛  
朱紱夢中猶憶布衣交星象何其動天闕何來  
心事誰所知天與先生留釣磯雲臺豐功並日  
月一竿獨幸垂綸絲君不見唐虞之世咨臯禹  
尚容泉石棲巢許又不見周武治平多亂臣採  
薇亦有西山人鍾鼎山林元一物雲霄不博烟  
霞身丈夫磊落在天地如何也作西施顰桐江  
之山何萃律桐江之水清且冽至今景慕先生

風添得江山兩奇絕臺邊溪徑本無多歲歲春  
溪長薜蘿漸余萍跡空碌碌此身未返青山阿  
寒瀨手持一竿竹御榻腹橫雙老足事業縱教  
千古獨一點浮雲閑過目世悠悠士碌碌至今  
遊者我為誰大嘯一聲江水綠

鄧德昌

吳世良

吁嗟魏乎奇哉釣臺雙峙摩蒼穹太華金精不  
足數恍惚飛來石屋失天工幾回亭榭倚杖陟

九級信覺身世飄脫塵埃中古藤陰翁掩日月  
怪石嶙峋盤蛟龍谷際松聲應灘瀨中霄隱隱  
鳴琤琮海門鱗翻鵬鳥擊怒瀾噴雪迴折九里  
嶽漉湧望開盧肇賦奮逐魂揚子晉忠四面崢  
嶸羅列似孫子紫翠削出金芙蓉青溪淳安港口萬  
壑瀉浩蕩繡嶺千巖帶龍窠十二朱闌延佇久  
咫尺銀河掩映廣寒宮名葩異葉春不斷鋪裯  
墜粉明窻櫺淇園將徑扶疎護玉柱琅玕冉冉  
白雲封吁嗟魏乎奇哉釣臺幽勝冠南國先生

芳譽應典高臺並老何終窮慨昔新鬼煽妖黃  
霧塞白水真人起義卒旌旗西何掃群雄洛陽  
快覩舊文物馮吳寇鄧荷戈從出膺垣翰入輔  
弼羊裘老子少同學爭期遘會依天日如何大  
澤復桐江白髮江湖竟遊逸不聞莘野耕磻溪  
漁烹鼎鷹揚勲績並掀揭一朝脫迹那躊躇中  
興天子勤宿好二微物色備安車供出天廚頻  
引卧湯文聘訪豈相殊考槃竟阻伊姜遇無乃  
天家禮意還成虛詔命豈堪延保傅故人自合

致手書况符要領會仁義周黨儒仲非儔足繼  
緒仍將好爵糜高致那為諫議屈先生不應意  
有在足加帝腹非狂介君房求益信是痴位至  
鼎足何危殆况兼九重用法繩尚書御史輒繫  
逮上相朱浮倏免歸骨鯁韓歆竟遇害先生夙  
昔窺其微歸向越漪垂釣絲青笠綠蓑烟雨暮  
漁歌欸乃棹歸遲林杪不貽猿鶴怨浦沙時見  
鷺鷥隨至今陳迹環翠峯風伸冰骨儼遺祠紛  
紛軒蓋薦蒞藻遲迴空復希文碑吁嗟鍾鼎簪  
組縈繫誰止足八貂七葉競奔逐倒屣擁篲解  
幾人畏途瞿峽禍倚伏先生孤潔障崩濤方餌  
直釣解會興陶陶贏得東京崇勁直清脩猶自  
激孫曹吁嗟魏乎竒哉雲臺那似釣臺高蹇余  
作吏吳楚間觀光璧水厠

李東陽

劉文叔加我足侯君房瞋我月平生若遣吾喪  
我有目如盲足如跛安能城市復山林朝望暮  
還無不可君不見嚴陵山水高復深誰哉更識  
先生心

邵寶

陵來為臣陵亦有言輔義懷仁吾喪我守臣於  
何有陵去為友客星犯兮日月光故人去兮江  
水長來時心去時迹山有雲兮江有石

顧應祥

垂老閒行艤舟向嚴陵灘側瞻廟貌高風千古  
水清玉白偃卧不知天子貴官從故舊干顏色  
把一犁耕破富春雲寧勞力○明良會吾所識  
丘壑廣仕途窄况吾腰一折要伸難得三聘始

來來即去冥鴻萬古烟霄歸隱處江閣遍往來  
艇奔波客

姜璉

何物軒裳那能立未央宮側桐江上怎生割捨  
風清月白星宿空搖帝座光雲霞封斷青山色  
抗東都九鼎一絲風先生力○有心做無人識  
物外瀾人間窄倦雙岷天倚與誰分得七里灘  
田魚鳥親一方水曲薰葭隔嘆巢由千載道無  
傳羊裘客



吳文元

炎祚中興日桐江隱客星不貪名利重惟愛釣  
絲輕高節凌霄漢清風絕世塵故人曾訪道萬  
乘擁柴荆

畢亨

氣節扶炎祚綸竿豈釣名人心終不死廟貌儼  
如生木落長江迥山高獨樹平灘頭明月在照  
見古今情

吳福

暫脫羊裘日方當物色時客星凌帝座人事有  
天知不負平生友難辜帝者師諫垣在何處耕  
釣寔相宜

楊樵

絕巘雲平樹登臺訪逸民乾坤雙砥柱今古一  
絲綸天上交游盡山中歲月新何人知此意吾  
自任吾真

謝肅

南征屢泊桐江船想像高風灑九天二十八將

豈吾侶一千餘年無爾賢使旆已承堯日照釣  
臺難覓客星懸最憐碑碣生苔蘚俯仰雲

山重  
慨然

周叙

睦州城北日斜時望入嚴灘思欲馳舫權捫蘿  
尋故迹扶筇秉燭看豐碑雲臺圖畫當時烈烟  
水風情百世師夜色蒼蒼釣竿冷耿光猶

似客  
星垂

洪璵

當年漢主共鄉閭萬里應煩使者車東帛豈能  
回素節公卿莫為降除書朝廷自此知名重草

木從教入夢疎火德中興文武備老夫急

放隱  
江魚

吳玘

當年不肯事王侯甘向烟波侶白鷗誤着羊裘  
來釣隱遂教龍袞得徵求石苔遠接蘼蕪曉祠  
宇涼扃竹樹秋惟有清風高節在桐江百  
赤符漢主已龍飛故舊情深自布衣太史謾勞  
占象緯先生偏愛老漁磯祗緣物外無榮辱不  
向塵中計是非百尺絲綸一時事芳名千

古竟  
巍巍

史瓘

笑倚西風懶下臺任君徵詔幾回開桐江有志  
甘垂釣漢室何勞苦辟才大節萬年昭宇宙清  
風千古淨塵埃椒漿一奠情何劇惆悵先生再  
不來  
先生高尚古來稀嘆息如今事已非節義風顏  
隨地滾利名湯熱儘人為釣臺突兀凌晴漢祠  
廟荒涼對夕暉艤棹登堂躬拜謁高山仰止思  
依依

江孟綸

兩峯石聳半山隈問是先生舊釣臺一節不為  
明主屈九重空望故人来養成江上烟波趣閑

却曾中柱石才敬蕤辦香祠下拜為君堪喜亦  
堪哀  
桐江岸畔泊舟來謁罷祠堂上釣臺人慕高風  
心似醉試瞻遺跡眼重開繫身豈學巢由僻濟  
世寧無伊傅才漢主不將臣禮召先生故態或  
能回

吳立

故人三聘入金門前席從容共討論諫議固辭  
青鎖闥客星忽把紫微垣釣臺架石半空出清  
節流芳萬古存愧我驅馳忍相見畫舫過處幾  
黃昏

高銓

漢業中興四海同羊棗何處避行蹤客星敢犯  
君臣分帝座能先故舊容小釣有心成遠隱浮  
名無意到斜封雲山烟水蒼茫裏遺像分明景  
仰中

戴仁

昔年曾向此停舟以目重來謁隱流高節不圖  
榮歎錦清風贏得重羊棗客星帝座名千古綠  
水青山釣一鉤繡斧無緣忘寵辱野花啼鳥吟  
吾儔

童軒

遺臺臨水鬱嵯峨西漢高風耿不磨歲月忽驚

人已遠江山如待客重過一竿肯為浮名出五

鼎空懸祿賜多惆悵壽陵何處是青山依舊屬  
漁篋

秦金

我初桐江行還從釣臺憩臺下雲蒼蒼臺上石  
齒齒悠悠千古心寒月浸江水清風不可招只  
尺猶萬里蹇予宦遊身塵緣未由洗再拜仰遺  
容吾願真有此

程敏政

不作中興諫議臣歸來仍許祿終身要令公相

慚台鼎正謂先生樂釣綸黃鵠遡風非漫士赤  
龍當極是真人雨中未得供蘋藻一日乘潮入  
富春

暫擲綸竿去復還微書空照水雲閒桐江巖壑  
知心久不遣移文過北山

孫燧

故人天上膺飛龍漁老桐江第一峰此日登臨  
謁祠廟完名高節許誰同

洛陽神武靖羶塵便向桐江樂隱綸假使當年

榮諫議先是終是漢朝人

桐江舊有子陵臺今日乘舸特地來高節難攀  
遺跡在微風落日重徘徊

陳獻章

聊拈彩筆點行藏便有乾坤日月光三尺羊裘  
幾銖兩千秋龍衮共低昂星纏變動天機速脚  
板橫加帝腹香非是先生薄光武直推東漢作  
陶唐

羊裘不返道終疑玉帛雖來事可知天下君臣

光武詔世間膾炙子陵碑故人不改狂奴態一  
事堪為百世師九鼎漢家從此重聽歌山谷老  
人詩

桐江秋水來天地照見千年老鳳還太史直書  
形迹外先生猶在是非間交情此去投當宁年  
事何勞列從班從向東吳問遺老江湖客有此  
翁閑

先生如此亦天民高坐桐江一水濱却到陵夷  
排亂賊方知名節是忠臣白鷗自去江湖遠黃

紙何來道路頻往往見人東廡下傷心一代帝  
王真

姜麟

世故無人識顯藏羊裘莫恨欠埋光軒裳塵土  
誰云隱玉帛權衡未覺昂風引釣絲長亦短簑  
紉江草破還香漢書錯著先生傳千載巢由不  
繫唐

堅卧輕車我亦疑箇中心事更誰知天封一壑  
雲霞表壁削天涯草樹碑客宿故垂師友象漁

釣臺集卷之十  
九  
竿不換帝王師史官議論無憑據何況騷人墨士詩

天與桐江綠一灣布衣趨召布衣還心游朋友君臣際道在雲山江水間周黨王良何足齒許由巢父定為班釣竿孰謂無功烈獨為乾坤立大閑

還是天民是逸民一竿坐老浙江濱青山有地藏漁父白髮無心作諫臣加以雙趺猶涉傲比之三聘未為頻誰云真隱無名姓風動人間隱

更真

阮鶚

江舟下初月遠照子陵臺臺下春水生臺上春風來醉乘東海鶴直向北山隈美人乍相見懷抱鬱始開風波一轉眼驚我春夢迴耿耿不能寐披衣望三台

林瀚

富春山下客舟過長桡清風感慨多龍衮故人天上夢羊裘漁父水邊歌一磯煙月還如舊五

夜星辰竟若何面想流芳千載事桐江波似渭  
江波

身外功名重半毫豈知霄漢客星高故人若問  
經綸事短髮漁翁不耐勞

山遶桐江見此臺天開形勢自崔嵬中興人物  
曾圖像名教何歸釣隱來

沈翊

羊裘一着自身輕不羨金章紫綬榮千古釣魚  
臺下水至今流出世間清

江源

故人不是湯文萃此老徒追伊呂蹤回首桐江  
理烟艇何心黃屋補山龍雲臺蕪沒空名在釣  
石崢嶸積翠重我過祠前三稽顙千年香火儼遺容

金詵

晚泊寒江問地名巖灘正對白鷗汀故人不解  
先生意太史焉知處士星雲遶古祠秋漠漠浪  
翻孤月夜冥冥富春山借羊裘重萬古巖巖只廢青

唐子昌



出視尊榮避遠丘一竿烟雨一羊裘不隨北野  
飛龍去寧伴南山隱豹遊卧感客星明漢表坐  
遺釣石障江陬炎劉臺閣今何在嚴瀨清名萬古留

李際

危臺壁立瞰江流拜謁先生暫繫舟苦節百年  
留宇宙清風千載重羊裘不教事業昭鍾鼎未  
許功名上釣鉤我亦迷途終歷祿厚顏何敢望前脩

黎暹

閑雲意態鶴風姿一代人豪百世師大義君臣

光武詔高風山水仲淹碑遠扶漢室千鈞鼎力  
在桐江幾尺絲倚徧祠堂門外樹西風斜日不勝思  
輕却功名重釣絲富春高視衆山卑敢空後世  
無巢父只恐前身是伯夷秦宇孤風無處著夜  
床一足有天知不行獨善行兼善寄謝揚公更勿疑

宋漢

七里灘頭舊富春先生曾以樂天真一竿獨釣  
江心月兩眼閑看世上人誤着羊裘來物色肯  
求麟閣寫精神臺荒人去瞻遺像千古高風陋漢臣

謝鐸

便非物色也難藏山玉川珠每自光不識真龍  
誰矯矯直教野鶴自昂昂蹉跎林下十年夢感  
慨平生一瓣香最是三公真不換白頭羞殺老馮唐  
徃來屑屑不堪疑進退平生只自知千載未分  
周黨毀幾人不愧蔡邕碑高風再起西京懦苦  
節竟為東漢師江水雲山看有極東吳人老更無詩  
林光

羊裘大澤噐深藏雲物終難掩瑞光今古幾人

空愧畏乾坤此老尚軒昂安劉祚漢心情遠剩  
水殘山姓字香描出白雲舒卷意誰家詩筆妙  
同袍禮數未須疑回首青山是故知迢遞幾來  
塵裏眼摩娑還讀廟前碑長竿自作江湖主寸  
舌誰為帝者師莫問榮華風燭事棹歌留詠子陵詩  
桐江老子持竿手旋轉乾坤一氣還欲識江湖  
關繫處試觀星宿盪摩間難同劉漢論心曲合  
與夷齊議輩班仰止高山千載下身閑原亦是心閑  
羊裘坐老葛天民物色何心到海濱鄉曲心情

須長幼重書名分是君臣千年公案留詩詠七  
里灘頭艤棹頻無限青山溪一帶水雲吾亦任吾真

陳潭

渚蘋香薦子陵祠竚立躊躇有所思九鼎中興  
炎祚日一竿獨坐水村時雲臺宿草涼烟沒嚴  
瀨清風明月知仰止高山心境寂勞勞塵歎覺來遲

薛綱

百尺高臺照碧漪羊裘心迹許誰知眼中已自  
空文叔名下何曾讓伯夷輔義懷仁無愧德廉

頑立懦有餘師東京節義如山重都擊先生一釣絲

天上故人垂冕旒澤中老子着羊裘空施漢網

終難致若載周車亦可留萬古清風流宇宙一

生高節薄王侯嗟予皓首功名客羞向臺前泊去舟

宋旻

錦峯繡嶺富春山一領羊裘一釣竿志在巢由  
難逼迫心高日月樂盤桓客星有犯徒瞻象諫  
議歸榮不屈官遂使清風千古盛至今人羨子陵灘

陳桂

赤龍天上駕羣才何獨逃名卧釣臺明月一竿  
應自得玄纁三聘只虛來江山寂寂空秋草雲  
石蒼蒼積翠苔夜半客星無復見高風千古抗  
浮埃

五鼎何如一釣竿羊裘端不博蟬冠高名直與  
乾坤老清節能令星斗寒問俗已無談漢室逢  
人猶有說嚴灘摩娑先正碑銘在幾度臨風仔細看

葉宗周

閑雲漠漠隱長才百尺絲綸一釣臺已許青山

同我老任教丹詔自天來西風江起千層浪春  
雨磯添一夜苔却愛嚴灘清似練臨流不敢滌  
塵埃

烟雨磯頭百尺竿漁衣何羨漢衣冠交情不較  
君臣重氣節猶凌霜雪寒一片閑雲留古廟千  
年明月照晴灘雲臺多少英雄者那得高名萬占看

吳伯通

天地應窺道顯藏漁竿終始此韜光清風北海  
人千古名節東都子一昂漢鼎已綠垂釣重桐

江長帶濯纓香只論隱逸常冠冕豈獨區區絕  
紀唐

夫子行藏今古疑一生心事少人知功於宇宙  
風非雨跡託文章史愧碑天上星辰他我客世  
間仁義孰吾師青山此意曾不識欲問無言漫  
着詩

故舊有情聊北去君臣不偶又東還高懷仁義  
三王上肯事遨遊二帝間桐火烟霞長焯焯漢  
書遺逸故班班英風一代奸雄沮節義元來是

大開

昔賢雅志豈忘民甘老經綸寂寞濱伯業中興  
先有佐故人垂老可堪臣詩書共學心猶隔良  
黨齊徵禮謾頻帝也同符况高祖商山不

屈見還真  
陳鈞

古臺斜瞰大江湄高節清風一釣絲劔氣若依  
龍去久壘書應怪鳳來遲狂奴故態君能識諸  
將中興我不知回首英雄西漢士韓彭何事任  
奔馳

張琳

天地原資泰贊功赤符况復故人逢似知貧賤  
難邀主豈識絲綸易隱踪桐水一泓含碧月乾  
坤萬古挹清風雲臺麟閣知何在翹首先

生汗  
頰紅

尹洪

怪石巖巖出水涯昔賢於此託襟期百年高節  
加光武千載清風等伯夷去日曾云資道藝得  
時仍合拜賓師人倫自古稱堯舜莫問先

生理  
釣絲

李德恢

富春巖半子陵居只釣清風不釣魚過客有題  
常住棹荒山無地可回車獨憐孤節寒潭冷誰  
笑長竿巨鯉踈千歲斯文儼遺像臨風一

奠幾  
騎湖

周良材

羊裘耕釣粵山叢物色曾勞出漢宮身到朝廷  
難屈服名隨天地莫終窮逼人清氣瞻依處絕  
俗高風景仰中今古臺前一灣水往來人

盪洗  
九乘

董瑛

雲臺孰與釣臺高謂以千釣彼一毛隻手獨扶

名教重衆心同効霸功勞故人不易勤三聘英  
主終難棄六韜莫怪客星甘隱遁何當列宿奮  
雄豪

林俊

此夫不減狂奴態物色空將束帛迎薄向青溪  
成小隱敢勞黃屋借虛聲古今獨有君臣契霄  
漢寧無故舊情耿鄧諸人佐真主釣臺容放一  
絲輕

魚水千年亦此遭虛名如影竟誰逃行藏祇合  
居巢許步武奚當接禹臯龍衮羊裘終自信客

星帝座漫相高當時若領賓師意黃紙何須道  
路勞

歲宴維舟倚薜蘿滄江落日見漁歌綸竿底好  
忙歸去鍾鼎良佳柰懶何陵谷幾移新世態水  
雲長遠舊吟窩商山却小園黃犂瀨老紛飛入  
網羅

司馬聖

萬古桐江一釣絲高風卓識是吾師應憐白首  
共文叔未若黃金鑄子期鳳去高臺天漠漠龍  
飛故國黍離離阿誰誤認容歸量得似當年獵

渭時

歸舟坐對富春山  
揆面清光照客顏  
故態未諳加足處  
野情多認釣絲閒  
翠華青瑣還成夢  
蒼巘丹崖轉莫攀  
一曲高歌再三嘆  
好風吹送短篷還

兩漢清風在岷山  
紫芝誰復嘆商顏  
獨將心跡塵氛外  
祇許夷齊伯仲間  
百歲交情真欲盡  
一官諫議可容攀  
棹頭也合乘由去  
如許烟霞豈浪還

湯守隨

物色羊裘禮弊迎  
殷勤三迓謁承明  
謔言已目狂奴態  
累日徒論故舊情  
帝座一宵生象急  
釣臺千載水波清  
幾回來往桐江上  
景仰高風敢濯纓

雲臺諸將佐中興  
欲屈先生竟不能  
手拂一絲扶漢鼎  
名留千古號嚴陵  
祠中遺像清風在  
磯畔殘碑翠靄凝  
林壑幽深多野趣  
頻過獨覺巖增

陳轅

漢廷吏事責三公  
難遣狂奴為改容  
帝座有星



曾奏客雲臺無筆可圖儂江湖契濶攀龍計廊  
廟禱求賣藥傭從此清風能起懦首陽千

載自  
追蹤

劉丙

維舟臺下憶丰姿厚意羊裘薄帝師何處堪尋  
炎漢鼎以山還植故人碑精神終古垂星象名  
節于今繫釣絲沙鳥向人渾欲語江湖廊廟一  
般思

未拜空懷仰止情拜來惆悵欲傷神故人四海  
今何在猶許先生占富春

張絳

眺望雙臺勢鬱葱漢廷清節獨推崇一竿風月  
巖灘上千尺絲綸繡嶺中便着羊裘輕九鼎任  
教鳳詔理孤蓬我過祠下頻瞻仰滿目雲

山思  
不窮

談綱

先生志不在功名便着羊裘豈有情釣月耕雲  
千古下超然洗耳一般清

浩氣英風了莫窺挺然間世好男兒眷傾人主  
真堪駭犯動天星未可知勲貴多應懷忌意明

良休謂不逢時徘徊亭上增惆悵明月清

風無限思

先生抱大材故簡帝心者至先生負大志故持隱操者堅謂着羊裘為有心蓋詩人之浪語固非知先生者謂帝為不足與有為則後人之妄議非特不知先生抑亦不知光武矣昔弗擾肝佛之召宣聖尚欲往輔而光武以大有為之君垂大欲為之眷顧不可輔耶然則先生之隱偏歎也伊於湯呂於文其際遇與先生同而伊於湯呂於文其際

濟斯世斯不迷邦故其出為空先生於光武其抱負與伊呂同而當天下已定之後欲展大材成大志不可待已故其處為高然則諫議之官賓師之位詎能留哉抑有疑焉太史曰客星犯帝座甚急夫先生精爽上應天象語其賢當為德星語其出當為輔弼星語其處當為少微星而曰客星可疑一也睡足誤加事蓋甚微何遽動夫渺茫固有誤批帝頰戲批帝頰者矣而天象不動可疑二也既有

動必有應不在先生當在他人而其後卒無  
應者可疑三也意者當時廷臣取功名於九  
死一生而先生荷帝眷於不事王侯忌心生  
矣侯霸位至鼎足先生痴之若兒廷臣誰復  
敢肩間心生矣霸備奏帝此一問也帝雖狂  
之而禮遇益隆人言不可問託天象以問之  
曰犯曰急語意甚於范升之毀謂非間計不  
可先生達此而決於隱高矣哉嗚呼先生不  
可復起臆見何所取正姑書亭壁幸觀者訂

劉玉

釣臺寂寞倚危岑臺下烟霞歲月深千古灘聲  
堪洗耳一時星象見傾心魚龍袞袞隨春雨鴻  
鴈遙遙避夕陰為問往來冠蓋客誰能維棹此登臨

洪珠

桐江日暮逐漁舟直入陵巖最上頭矗矗兩山  
懸日月濺濺寒瀨幾春秋清風不獨高千古薄  
俗何人悟重鈎尊酒祠前虛一拜野雲溪自愧沙鷗

張烜

一節堅操獨勵行子陵雅尚志之清忘形具識  
真王度辭爵非懸潔已名漢業重光羅俊傑釣  
臺何得遂先生細推物理皆天定不是台星是

霍韜

古人窮達豈身謀大舜也陪鹿豕游突見夷齊  
對湯武錯描箕穎高巢由共知饑溺同天下肯  
控崔嵬兀散表後世只看名利重却安渠清澗

陳察

高節清風仰釣臺祠堂還傍碧山開南陽不廢

伊姜禮西漢應空寇鄧才雲出錦峰蒼嶂岫月  
明桐水綠徘徊吳中客子曾三過又愧扁舟白

黃洪毗

同學故人自冕旒踈狂老子獨羊裘後車若肯  
師姜望大澤何甘傲許由萬里山河非漢土千  
年名姓尚嚴州往來笑我成何事倚棹祠前對

謝佑

四十年前上此臺而今登眺喜重來江山不滅  
當時興風月空懷異世才水面魚浮香餌寂岩

頭龍隱暮雲堆沙平戶落潮生處疑是先生絕

楊金

荒臺逗窄草垂垂上有蒼苔古字碑公去不求  
卿月貴我來初吊客星祠香名越水吳山重高  
誼青天白日知樹裏停舟一登眺晚風雲起碧  
參差

臺上雲烟接富春臺邊風物四時新乾坤氣節  
存遺廟江海幽棲得故人龍衮極知能下士羊  
裘元不為垂綸宦途自古多艱險莫怪先生重  
隱論

董世彥

一憶桐江便出關客星千古照滌溪  
羊裘不逐鷓行入釣石曾邀王節還  
忽送灘聲疑渭水平臨巖壑似箕山  
漢家若論中興盛誰謂雲

伍令

不逐群龍入帝鄉漁竿獨抱傲侯王  
風雲萬里堪盈籍川嶽千年孰主張  
古廟豐碑留地勝春山瑤草自天香  
江臺駐節瞻霄漢炯炯客

王化

星動  
曉芒

釣臺臺上白雲浮，臺下俯看江水流。  
荒草暮烟烏石嶺，落花新雨子陵洲。  
三吳地盡青山外，萬壑風迴越水頭。  
欲向祠前追往事，寒猿啼鳥不勝愁。

吳箕

巖老祠堂俯碧流，嵯峨釣石接雲浮。  
江天漠漠景偏麗，烟樹蒼蒼山更幽。  
勛業一時卑冠鄧，清風千古獨巢由。  
慚余仰止徒瞻拜，笑把漁竿漫白頭。

張翥

廟下江潭映碧峰，翠微雙石儼遺踪。  
當地樹木葉

寒生雨出谷灘聲，迥躍龍物色應同巖。  
野訪垂綸未學渭濱逢，只今半畝樓霞地。  
休比雲臺萬戶封。

黎循興

禹足招呼下使車，此情不愛帝王書。  
赤符未活南陽馬，白首何甘北澤魚。  
已許炎劉恢舊壤，肯將高節曳新裾。  
當時物色從凝望，獨對雲山憶古廬。

陸鈇

風塵自愧三湘客，漂泊來過七里灘。  
豈謂君王勤物色，却令夫子釣江干。  
青峰兩岸潮聲起，白

雪群鷗樹影寒衡嶽洞庭從此遍祇應無夢到

金鑿

江上孤峰落日黃祠邊松桂鬱蒼蒼風雲自護  
商山草雨露還愁漢署香人去釣磯侵碧蘚客  
來屣鞅駐滄浪思君不見多惆悵縹緲桐溪春水長

葉文繼

先生不為故人憂名耻雲臺閣上留岩壑路崎  
切鳳輦江干霧重濕羊裘日酣沙碧烟波晚月  
白山黃草樹秋興廢東都知幾代釣磯干古對清流

龔勉

富春山前霞可飡子陵祠下碧流湍三公不換  
一竿釣千古猶傳七里灘風急臺空松桂落雨  
餘沙白水雲寒南陽事業今何在瞻對依依坐  
石欄

曲曲桐江清可憐釣臺高聳白雲邊漢竿非故  
忘明主祇恐巢由竟絕傳

春山桐水足盤桓獨抱經綸付釣竿豈是狂奴  
仍故態客星原不照長安

登椿

桐江之水清徹底先生風味亦如此富春之山  
高莫攀先生節操真與班客星一夕動天上羊  
裘萬古猜人間先生大志自有在漢庭徒作狂  
奴看

故人已定君臣分嚴老非嫌諫議官最爾一裘  
披著暖巍然雙石坐來安雲臺彙進翰群策炎  
漢重興復舊觀海內蒼生都衽席不妨秉未與  
投竿

吳世良

曉發星槎七里瀨暮躋雲蹙九層臺胥江風起  
迴潮汐范碣秋深匝蘚苔把酒信期諧夙好時邀  
司登濯纓頃覺遠紛埃百年多病空萍迹明月  
客臺幽亭鴈陣哀

尋幽竟老富春山簸弄烟波七里灘誤看羊裘  
來物色那隨龍袞擲漁竿陰扶九鼎高風遠掩  
映中霄客宿寒巖石松亭雙鬱峙清風千載仰  
方干

三徵既備安車駕何事重居雲水鄉共說釣磯



藏渭老獨憐禮數愧周王故人只合崇師傅國  
事還應就酌量不會漁翁加足意客星萬古動  
寒芒

白水故人斬手書

用胡致堂不以手書招致乃以詔書從事意

青山

重見賁安車不聞帝業師資數自識天家禮意  
虛兩岸雨花春拂遍層臺雲鶴興常舒經過多  
少浮名客誰學方干並結廬

幾年燕市夢嚴瀨重倚孤亭落照間錦綉雲屏  
浮紫翠琮琤風籟響潺湲巖嵐猿鶴迎新主石

徑松蘿拂舊闕讀罷范碑增感悵忘機老傍鷺  
鷗閑

雙石峻崢倚碧天飛花落木晚含烟帶霞鶴鷺  
音棲斷得月樓臺影倒懸故態不因侯疏屈孤  
清尚托范碑鐫龍符麟閣俱塵蹟巢許芳

譽百世傳

張應雷

誰着羊裘釣此山至今猶共說嚴灘桐江月冷  
隨鷗睡富野春深伴鹿閑帝腹偶忘非瀨上客  
星詎意動雲間清秋徒倚幽祠下孤鶴峯

頭自往還

陳策

七里灘頭水聲急扁舟夜泊愁風雪客星空望  
釣臺高江山寂寂人蹤滅釣竿十尺不復持清  
風如在令人思十年奔走雙鬢白瓣香真魏謁  
公祠

謝迂柱

濯足清溪望碧岑雙臺猶共白雲深漢唐以下  
惟斯老山水之間見彼心釣艇烟波秋漠漠祠  
庭風葉晝陰陰蒲汀芷香堪薦千載塵聚魏  
幾臨

鄭鄘

羊裘獨擁濯滄浪巨耐官家物色怪肯向竿頭  
牽富貴聊將脚試君王復書漫浪誰忘故

屢聘歸來却道狂

狂

今日雲臺只杯土水聲猶

恨誤  
劉即

唐寅

漢皇故人釣魚磯魚磯自昔世人非青松滿山  
響樵斧自舸落日晒客衣眠牛立馬誰家牧鷓  
鴒鷓鴒無數飛嗟余漂泊隨饘粥渺渺江湖何  
所歸

吳儼

兩山相合樹蒼蒼百尺漁竿未當長齊客謾談

光武大漢廷翻笑子陵狂潮生潮落心無競雲  
去雲來覺太忙莫嘆桐江祠屋冷南陽遺事更荒涼

薛昂

東漢士多崇節義一時稱首屬先生人龍豈受  
塵纓縛麟鳳寧為世網嬰遺德儼然思故第清  
風允矣勵斯珉予方佐郡來祠下景仰令人薄  
宦情

李賓

桐江水碧鑒秋毫不蘸東都燕雀高祇有一絲

扶九鼎策勛元不在施勞

汪九齡

新領觀風命漫泛桐江舟江上山蒺蒺江中水  
悠悠言念臺上人飽此山水幽伊昔草澤時曾  
伴真龍遊龍已飛天去雲還棲故丘獨把絲綸  
手安然理釣鉤群漁皆有着不餌自無求真龍  
時相憶物色招其儔雲閒任舒卷天上不可留  
出山動象緯還山披羊裘力將一絲微扶彼九  
鼎優白雲去不歸千載風颼颼我來存蘋藻眺

望雲山秋素乘高人志寧復猜沙鷗山靈倘見  
許分我釣磯頭

竟日垂綸江上頭先生原不爲名鉤南陽帝子  
誤相識北闕徵書費訪求星象動搖因物色漢  
家衣被屬羊裘歸來再拜清祠下山自蒼蒼水  
自流

富春山下江水清富春山上客星明故人龍袞  
當天漢嚴子羊裘還釣耕七里遺祠孤象在千  
鈞扶舄一絲輕停舟欲荐無蘋藻目斷烟波感

慨生

黃鎬

雨晴祠下晚維舟雲自飛來水自流漢主固能  
招隱逸子陵安肯事王侯猿啼繡嶺長驚大漁  
釣桐江已狎鷗風節至今耿不盡空山明月使  
人愁

藍明之

水宿傍嚴灘風燈語夜闌鼉鳴潮信早龍過雨  
聲寒病喜看山好貧嗟行路難何當脫塵鞅來

此把漁竿

徐貫

兩石屹立白雲裏先生高卧堅不起故人天上  
握乾符幣聘慙勳亦徒爾紛紛誰不附飛龍獨  
把漁竿釣烟水一朝赴召便歸來空使客星占  
太史古來天民不苟出尋常詎可窺涯涘江流  
浩浩山蒼蒼千古清風激貪鄙

徐禎鄉

言訪羊裘隱荒臺迹宛然巖崖祠宇綴天漢客

星懸伊昔風雲感丘園束帛弋神龍不可係造  
化獨深全去矣孤蹤邈懷哉大澤偏釣竿何媯  
媯石瀨故濺濺郡以高名著山依汗簡傳餘風  
猶激懦聖代更招賢圭組誰憐辱襟期本尚玄  
終焉赴空谷寤寐白駒篇

鄭善夫

富春山下嚴陵瀨九日風光興不違白石滄波  
元自好鳴鷺飛鷺早知歸南陽文叔求賢遠相  
府侯生識面稀王業帝謨俱莫問百年江海有

漁磯

盧義

三公不換一羊裘此日歸來尚黑頭  
臺閣丹青知幾日江山清絕已千秋  
逃名不爲蒼生起伸足空令太史愁  
珍重東都名節在後來誰復繼前修

何舜賓

仰止先生此釣臺高名千古共崔嵬  
雲臺豈是非宏壯能與乾坤並久來

費宏

釣臺清峻照乾坤遺澤猶能及遠孫  
却嘆雲臺諸將帥有誰傳爵至今存

費霖

話舊忘形帝者難羊裘風雪自江干  
清時宜出何當隱君子全交不盡懽  
釣石一區猶壁立客星千古正芒寒  
可憐雲雨翻然處白日長門草自殘

吳廷舉

執御平生願登臨豈憚勞忽緣山磴險信得釣  
臺高廊廟身難退江湖分所遭卑卑千載下光  
武亦唐堯

釣水先生志還山聖主恩姓名光日月風節薄  
乾坤南郡楊公記高平范相文往來祠下客莫  
自浪推尊

董遵

桐江烟水碧於秋千古高風水共流白日我從  
臺下過且將塵袂洗餘羞

胡儼

兩山相望樹蒼蒼百尺漁竿引興長齊客謾誇  
光武大漢庭翻笑子陵狂潮生潮落心無競雲  
去雲來覺大忙莫嘆桐江祠屋冷南陽遺事更  
荒涼

張鶴楫

羊裘一去不復還秋水微茫烟霧間西望雲臺  
青草合只今人上富春山

胡謚

七里灘頭百尺磯  
渭川應自有心期  
徒屢物色來三聘  
未識經綸在一絲  
海寓正當炎祚復  
江湖俄望客星移  
憑將後代春秋筆  
載續希文舊勒碑

嚴嵩

嚴陵七里灘  
疊嶂俯澄灣  
雲物澹堪賞  
風標邈未攀  
龍飛初白水  
魚釣但青山  
千歲見孤廟  
蒼蒼烟霧間

徐縉

晚駐三湘節  
言過七里灘  
客星天漢上  
祠宇檜林端  
碧樹風烟迥  
蒼江暮色寒  
平生仰止意  
一爲薦芳蘭

王仁甫

江上好山青  
欲老江頭流水  
不西還  
萬年風節  
雲霄上一代  
君臣朋友間  
虞舜以來  
皆此道巢  
由之外更誰  
班雲臺不是  
三公地  
且作乾坤自  
在閑

廖道南



巖子釣石瀨桐君栖樹枝如何富春渚更有高  
風祠春雨浴山鳥暮潮鳴海嶼巍巍客星閣長  
照釣竿絲

裴紳

桐江垂釣幾經秋物色曾勞漢主求但使客星  
干帝座肯將軒冕勿羊裘冥鴻歷歷白雲遠碧  
樹亭亭芳草稠欲吊靈修何處是清風搖蕩木  
蘭舟

彭韶

移姓名鄉郡尊賢世所無臣恭非敢後友道不  
容孤物色遺漁釣風神寄畫圖朱村今尚在只  
可重樵夫

凌雲瀚

夷惠真爲百世師先生高節亦如之只將立懦  
廉頑意九鼎分明重一絲

胡定

巖生賣卜倫抗意釣璜外亦有畫象求徒勞後  
車載閉目譏文叔諫議不肯拜偃仰御榻間聊

作故人會長揖歸富春欲見不得再高卧佐中  
興流風開百代所以徐孺輩冥冥不可罣至今  
山中人生涯甘釣耒巖巖桐江臺浮雲何芥蒂  
登臺清冷然下臺有遺慨吾將濯吾纓恐汗巖  
陵瀨

王氣春陵盡嚴陵臺獨存河山盟祇重箕穎道  
誰尊尚憶君房語長占帝府昏故人俱一代感  
激更堪論

司馬聖

富春釣叟竟容歸越嶠樵夫願復違仕路風霜  
仍客髮故園丘壑自春暉九重共有真龍在萬  
里誰教倦鳥飛目斷高臺重回首野情幽興正  
依依

夏言

故人意君王識天度大凡襟窄只足腹相加幾  
人容得深淺交人貧富見古今人品天淵隔○  
嘆江湖落落少年知音客當年甘寂寞儀容  
此日增顏色激頽風軒冕等浮塵先生力

右滿江紅

漢庭懷舊德，獨愛水雲深。  
白髮一竿暮，青山七里春。  
江流閒歲月，夜景浴星辰。  
千載荒祠下，停舟人幾人。

羅洪先

趙琳

釣魚人去釣臺空，石徑崎嶇仗履通。  
登眺恍然霄漢外，行吟渾在畫圖中。  
一杯白引山間月，兩袖清生岩底風。  
往事悠悠成感慨，獨依秋水看芙蓉。

謝雍

羊裘初着澤陂中  
物色行看出漢宮  
九鼎能令王室重  
一官不受諫臺籠  
綸竿長釣孤高月  
溪壑猶存節義風  
淺薄儒生多仰德  
臺前慚不繫孤蓬蓬

羅鑒

漢世清風說釣臺  
巡行今日我重來  
登山步歷層雲級  
題句親磨舊壁苔  
帝客當年曾列象  
英豪千古歎遺才  
祠前畫鷁頻來往  
歌頌登臨日幾迴迴

趙羽



金臺集卷之二  
二十  
艤舟登陸躡危磯拂蘚分茆認斷碑仰慕高風  
同稽首野花閑草亦增奇

錢習禮

羊裘不染玉京塵拂袖歸來別故人  
鍾鼎爭如魚鳥樂一竿烟水釣桐濱

陳賓

世祖中興定九垓當時際遇總英才  
誰知海宇千年後不見雲臺見釣臺

張倬

龍虎中原息戰爭雲臺功業炳丹青  
誰知寂寞桐江上亦有羊裘動客星

曾榮

長竿七尺坐嚴灘不應徵書拜聖顏  
一段高風何處見至今留在富春山

吳訥

建武中興羅俊傑故人白首獨辭歸  
力開名節扶炎祚千古清風滿釣磯

范侯昔日記祠堂江水雲山共久長  
老者我來遊

鐘臺集卷之十一  
三十一  
嗟獨晚淒涼無地奠椒漿

祠燬基荒積歲年釣臺空記客星懸古今節義人同慕起廢還應望後賢

謝翱文相軍門客善哭當年最可悲死葬臺邊經百載草荒孤塚有誰知

胡姓

素抱經綸濟世才謾勞使者自天來故人不是劉光武未許羊裘老釣臺

張永

人去江山依舊清民風自是古今情仰天堪嘆還堪哭何處神交覓世程

張悅

自是先生識趣高却將身勢等鴻毛釣臺不似雲臺險肯脫羊裘換錦袍

山下祠堂傍水開每多行客拜祠來當時若脫羊裘去千載何人說釣臺

榮華只作等閑看生計依然一釣竿千古桐江江上路清風猶自逼人寒

客星又隕釣灘頭景物推遷幾度秋  
獨羨芳名在人世青山長峙水長流

沈義

高節清風不可攀花陰叢桂滿秋山  
浮名軒冕須臾事孰識先生一寸閒

富貴都歸一釣竿高風羸得古今看  
長安桃李無窮樹何似松枝耐歲寒

陳璧

漂渺桐江煙水開富春山下釣魚臺  
分明高似

凌烟閣寧得先生肯下來

王清

故人天上已龍衮先生澤畔自羊裘  
一絲牽破滄浪月羸得清風萬古流

吳汝弼

富春山下大江橫千古英雄幾戰爭  
今日秋毫非漢土釣臺猶自屬先生

羅明

龍爭虎戰幾英雄秋草咸陽霸業空  
水遠山高

無定主至今說是子陵風

臺前楊柳綠灣灣臺外長江去不還高節清風  
何處是行人猶指富春山

勁節挽回灘瀨水高風邀退海門潮一絲皂裊  
滄波上烟水寒雲鎖六朝

杜瓊

風生臺石釣絲輕世主恩深得盛名千古客星  
臺上望桐廬山水有餘清

王溥

俯仰乾坤渺一毫清高千古有誰高羊豨不向  
桐江釣物色何煩使者勞

李蘖

塵世浮生渺一毫江湖廊廟興誰高富春山下  
垂綸手不博雲臺汗馬勞

趙瑛

先生高節與清風立懦廉貪大有功千古芳名  
垂宇宙雲臺未許釣臺同

鄭紀



先生豈是愛孤高不為中興拔一毛試問雲臺  
諸將後幾家留得漢冠袍

石岳一片倚雲開引得詩人日日來我亦觀風  
曾駐節留題端不為高臺

封罷徵書翹首看到時一夢日三竿龍床軟  
應無筭不似羊裘善蔽寒

歸卧山中未白頭夢兔已隔漢廷秋當年物議  
多遺恨空付長江日夜流

停棹憐山秀濯纓愛水清未能脫塵網題咏不

留名

鳳詔頻徵聘龍床共起居老來嘗世味不及富

春魚和張南陽韻

澤中一男子何須兩釣臺天工久相待不見有

人來和范文正公韻

游學託知己遭逢喜聖明羊裘披帝座寧似釣

臺清和王梅溪韻

峩峩富春山汪汪桐江水版圖幾變更猶屬嚴

夫子和范香溪韻

龍馭臨孤館羊羔裘詔意故人兩淪沒灘水自

泱泱和錢吏部韻

故人稱知己原是不相知真主千年業狂奴兩

鬢絲和錢吏部韻

漢鼎已非古嚴灘留至今徒聞釣魚叟誰識釣

魚心和釋德脩韻

物色應明詔胡為去又來故人不相信偏我上

雲臺和趙吳興韻

床頭書幾卷臺畔一竿竿何必變名姓而今劉

已安和李侍御韻

脫裘漢鼎重把釣漢風清咄咄狂奴態原來不

為名復自和

林沂

故態狂奴竟不臣甘心來釣富春濱千秋不遇

范夫子名教誰知屬此人

鄒霧

二十年前志氣豪紅塵奔走不知勞如今蕉鹿

夢初醒始信先生一念高

不從軒冕閑英豪獨着羊裘此任勞莫道一絲  
千繫小清風千古釣臺高

楊峻

桐江江上擅雄豪勤破心閑勝彼勞贏得英君  
天地量遂令清節古今高  
江山秀氣萬人豪垂釣桐江自分勞不是釣臺  
祠上記先生清節有誰高

王衡

逍遙物外久忘機抱甕耕雲尚可為何事一竿

惟釣月也應濠上最相知

利器傳家不示人河山永矢未全身白雲乘去  
遺言在獨有先生認得真

王弼

草昧曾無一策干先生蹤跡已漁竿艱難不共  
秋毫力肯向昇平拜好官

山作先生磊砢容一江秋水作心宵怪來咄咄  
難相下直有清高萬古風

遠來物色知交態老作漁夫亦帝仁莫道孤高

真絕世平生朋友與君臣

直從東漢後千秋齷齪真憑世道憂砥柱如公  
高萬丈長江還復有頽流

徐憚

三度徵書始一開故人見罷即歸來濯纓祇在  
桐江上高節清風遍九垓

鳳去臺空不記年訪尋遺跡尚依然錦峯繡嶺  
遨遊處松栢蒼蒼鎖暮烟

對峙雙臺百尺高長竿遠舉豈勝勞先生自是

人中傑不釣纖鱗釣巨鰲

陰子淑

先生志與渾庭違不為沽名便乞歸今向江頭  
訪遺跡錯疑只戀舊漁磯

歸隱曾緣底事忙孤高竟謝漢冠裳幾多畫入  
雲臺者試比聲光孰短長

李伯通

石臺高古辟蘿亭廟貌崢嶸已有年仰止高風  
千載上幾迴臺下泊樓船

紅塵不染白雲牽有約溪山老此年真隱一心  
人未解微書空到釣魚船

漢室中興夢不牽羊裘澤畔樂天年朋簪禹古  
人倫至只在長竿一釣船

刑相

只說當年盜一杯愚民應不壽陵留祗今剩有  
高臺在依舊青青峙碧流

常憶當年為抱薪中興誰是舊君臣却憐明月  
清風裡猶自年年有故人

俞諫

古石懸厓若建甃荒亭忽易奉祠生浮雲幾見  
更新主惟有青山總一情

徐憚

鳳去臺空不記年訪尋遺跡尚依然錦峯繡嶺  
遨遊處松栢蒼蒼鎖暮烟

又

對峙雙臺百尺高長竿遠舉豈勝勞先生自是  
人中傑不釣纖鱗釣巨鰲

陳經邦

桐江有清泚富澤多白雲漁釣堪逃世羊裘可  
傲君山河漢鼎改宇宙客星存谿流吾欲掬千  
載挹餘芬

又

軒冕無心戀漢廷先生高節薄青冥百年天地  
容狂態萬里江湖隱客星不使巢由偏洗耳肯  
隨賈鄧共圖形嗟余碌碌成何事仰止瓊臺愧  
屢經

唐理

韋布論交在遠期狂奴非故負相知要將出處  
同伊尹肯把清高讓伯夷漢業只今成往跡嚴  
陵依舊薦荒祠堪嗟諸將空圖畫不及先生一  
釣絲

陳陞

尋龍來七里泊岸有孤舟水碧纓堪濯臺空釣  
已收風塵悲市道慷慨拜清流何日能懸解溪  
邊借一舟

先生祠下水常作鏡面寒明月澄蒼臺清風漾  
琅玕臺可坐兮竿可釣百千年後誰同調野人  
照水羞塵容對此悠悠發長嘯

章拯

王德溢

古堂羅桂野雲深雙石崢嶸起翠岑未挽唐虞  
酬卅世錯教巢許認初心丹山碧水先生像白  
日青天御史箴舒卷於人成筭在不須昏曉過  
江潯

錢仲益

嚴陵城郭倚岩巖使節曾過七里灘斷碣文漫  
蒼鮮滑高臺長鎖白雲寒一時玄象千宸宸千  
古清風萬釣竿登覽未窮官棹發寫將出景到  
家看

張瑄

不把羊裘博錦袍先生制行一何高眼中蔑視  
三公貴萬里雲霄一羽毛

黃文豪

雲臺繪畫丹青好，爭似桐江山。水奇絕壁，猿棲  
臺石峭寒潭。月映釣竿，垂三公不入山中夢。九  
島終扶，上綠幾度扁舟。祠下過清風，猶覺棹  
蓬吹。

曹珪

事歇因稀憶釣泉，清風凜凜逼塵烟。狐裘志似  
羊裘，貴金屋何如石屋。堅雙脚踏沉波底，月一  
鉤挽起水中天。桐江江上多來往，試問誰為兩  
漢賢。

朱廷益

千古江流繫釣懸，九天御座見星纏。何如展却  
絲綸手，掃盡湖山萬里烟。

寇陽

帝子當年意甚勞，故人同卧客星高。先生何事  
渾忘世，諫議區區等一毛。

楊當時

先生不拜故人官，物色桐江老釣竿。日月並依  
龍衮重，烟霞偏染布袍寬。臺荒烏宿千山草，潮



落魚游七里灘萬古乾坤竟誰是我來長嘯客  
星寒

鄭繼之

釣臺東接峽江流臺上平臨歐冶州豪客乘風  
時有賦海翁無事自忘憂中原目斷冥鴻路落  
日愁生芳野洲歲晚烟波浩無極鷗鷺瀟瀟傍  
人遊

富春山下嚴陵瀨九日風光興不違白石滄波  
元自好鳴鷗飛鷺早知歸南陽文叔求賢遠相

府侯生識面稀王業帝謨俱莫問百年滄海有  
漁磯

楊一清

釣臺百尺俯江灘生不求榮死亦安人道客星  
干帝座誰知漢鼎仗漁竿烟霞絕壁清風在香  
火空山白晝寒再拜匆匆還仰止詩成回首一  
凭欄

仗履飄然出帝居故人心事幾躊躇一官豈必  
供言責三聘何須用詔書祠廟僅存非後裔山

川不朽是芳譽雲臺汗馬終黃土始信羊裘計  
未踈

李東陽

嚴陵祠下揚帆處不見先生見釣臺巨石倚空  
紅葉下冥鴻衝雨朔風回明時合重巢由節濟  
世非輕管葛才莫道羊裘非隱物山川不礙去  
能來

龔用鄉

蒼山拔地起兩岸雲屏開峭竒篳傑構云是子

陵臺子陵臺高百千仞烈風颯颯萬山震丹崖  
鐵障插青冥屹立頽波作雄鎮我曾三謁先生  
祠披萊艤棹江之湄舟車未至即物色童穉皆  
稱百世師荒烟隱霧蔽溪谷此臺巍然山之麓  
壯氣直凌霄漢間金城朝暮排雲關懸岩聳峯  
烟霞表再拜如對先生顏漢家九鼎未足貴羊  
裘豈羨三公位綱常自古用人扶東京節義公  
之氣桐江一絲不得臣光皇自是非常人立茲  
休光耿宇宙迄今千載歸堯仁吁嗟乎嚴山高

嚴水清上連牛斗不盈尺下有泓洞蛟龍吟高  
風可仰不可攀清名萬古誰與京先生之風正  
如此至今千載垂芳聲

盧襄

釣臺突兀斷厓傾臺下荒祠映古桧朋友君臣  
俱大義江山日月自高名幡然未負湯三聘逝  
矣何慚魯兩生蓴菜鱸魚摠堪薦驛舟淹宿有  
餘情

鄭姓

好箇嚴子陵不仕漢光武先生有雙臺漢家無  
寸土

殷雲霄

我愧不如嚴子陵釣臺深處亂山青雲臺當日  
多正業天漢千年自客星遺跡可憐開翠壁乘  
浮終去入滄溟滿江風雨愁蘭棹吾道無勞問  
洞庭

子陵釣臺江之濱冥冥雲霞雙岫嶙高名寥廓  
我何意束帛荒涼今幾春一官未謝風塵路萬

事空餘愁病身扁舟不知其所往風雨桐廬欲  
問津

富春山上雲蒼蒼子陵墳前江水長百戰韓彭  
無墓地千年樵牧有椒漿絕巘寒風摧短髮長  
波落日動孤航多懷欲采芳洲薦楓葉瀟瀟天  
雨霜

子陵祠屋碧崔嵬細雨扁舟此夕來山色不隨  
炎渚去潮聲猶帶伍員哀一時圭組憐英俊萬  
古風雲閱草萊何限幽懷無可問海天逸鶴幾

時回

康從理

青山中劃大江流千載嚴家有故洲片石遂能  
高列土孤雲真若見披裘春容雨壓祠宮樹夜  
色星隨客子舟滄海只今垂釣去含情一擷渚  
蘋羞

黎民表

持竿將擬釣滄溟猶向荒臺問客星江入新安  
千丈碧兩來漁浦一帆青藥名盡入桐君傳泉

品何煩陸羽經擬是拂衣還有恨末芳能得幾  
回停

楊應詔

倚檝嚴陵瀨登登富春山白雲去不遠千載有  
餘閒漢使彤臺上羊裘石室間幽懷渺天地獨  
鶴幾時還  
片月挂寒砧煠煙澄碧林我來漢鼎歆獨眺古  
臺潯諸將寧龍躍先生豈陸沉扁舟方遠去出  
處未論心

趙綱

南陵宗室已龍飛何事先生老釣磯各占一邊  
高地位治功清節總巍巍

林塾

偶爾西來覓釣磯桐江春水正魚肥當年若受  
君王寵便是人間有是非

自是君臣朋友間先生打透一關還山青月白  
千年在猶有廉風可訂頑

張愷

子陵嚴先生之出處古今未有定論或以為其跡似傲或以為終欠時值又或以其知光武之不足與有為甚至詆其着羊裘為有心其不俚于口甚矣後世名公鉅儒騷人墨客長篇大章不過誇詡其清風高節足以激天下之頹俗而已固未有論其出處之義者雖近世白沙陳公亦以是非之間疑之愷獨以為不然夫人之大倫有五君臣朋友皆以義合不可得而輕重者先生之於光武少同游學則固以友道行之也

一旦光武尊居九五物色得之先生之意若曰文叔於吾勢雖君臣義則朋友勢可忘也義可屈乎義不可屈則吾知友而已矣何富貴之足云乎使義而可屈則貴可易交富可易妻舉天下之事皆可以富貴易之矣義安在乎惟其不屈此先生之所以為高而范文正所謂微先生不能成光武之大者乃所以全其交也交全則義全矣夫君子之於天下也無適也無莫也惟義與比耳義之所在金石可貫白刃可蹈而况

於區區之爵祿乎故安車玄纁雖人主招賢之禮而足加帝腹乃朋游寢處之常蓋不以勢分之拘而廢故舊之情也或又以軒冕之不如羊裘雲臺之不如釣臺賢勞之不如隱逸謂公為高者尤非至當之論蓋君臣之義根於人心之固有無所逃於天地之間者也苟徒以不仕為高則晨門荷蕢接輿沮溺之徒皆出聖人之右而莘野之改渭濱之起傅巖之來商山之出皆非也邪詩曰率土之濱莫非王臣傳曰在國曰

市井之臣在野曰草莽之臣若先生者顧欲自列於草莽之臣爾豈固以不仕為高哉厥後清節之士黨慕成風至有禁錮流離沒身不易其操而姦雄染指不敢窺漢鵠者則皆先生之義聲有以激之也猗歟休哉愷自往歲一經灘瀨未獲登謁心甚慊然乃今適有閩省之行晚泊臺下拜瞻遺像敬仰高風不勝慚悚姑備一說用書于壁非敢以為必然尚俟有道君子相與質之因作四絕句云

萬古桐江一釣緡布衣高節逼星辰只今惟有  
臺前月長與南陽照故人

先生不仕非無義正愧人間勢利交若使當時  
身便屈釣臺寧免比山嘲

後來隱逸多奇士欲學先生恐未然自古君臣  
有常分論交不是布衣前

世祖功成軒冕貴子陵義合布韋貧不須抗節  
論巢許鐘鼎簞瓢各任真

鄒魯

漢家霸業半成時平仲夷吾足寄之自是先生  
無處用歸來閑弄釣魚絲

賈宗錫

富春景好千年跡嚴老風清一代豪今日登堂  
拜遺像浮名爭似釣臺高

管達

丹鳳高飛避漢籠富春風月許誰同一竿自信  
清名遠不換中興將帥功

赤伏符中景運回四方泣覩漢官來英雄滿眼



興王佐羸得先生上釣臺

張景

先生精爽動星辰迺驗堅操一念真却憶終南  
誇捷徑青天白日媿斯人

漠漠桐江一釣絲漢家九鼎藉綱維庶貪立懦  
風千古清節高修並伯夷

武林遍訪宋遺宮仙掌銅駝舊蹟空爭似釣臺  
關係重巋然千載播高風

四海高人嚴子陵古今仰止自皆興辦香同下

今登拜問俗觀風媿此膺

王崇慶

壬午年間過釣臺紫霞影裏鶴飛來繁華回首  
俱春夢又向東風思野梅

荒臺聊落誰為主惆望桐江問客星千古清風  
掃頑俗始知富貴是浮萍

宿應麟

昔日曾登此釣臺臺高不只在崔嵬清風百世  
人皆仰我故欣欣今又來

釣臺原說在桐江今日分符亦此邦坐愛清風  
歸去晚先生使我欲心降

汪大受

大澤羊裘莫漫猜溪山豈為避名來多情却怪  
劉文叔物色千年上釣臺

白石清江一釣心漫隨流水共浮雲客星不識  
天皇座空使人疑傲漢君

桐江江上碧粼粼兩岸青山萬樹春湖海已分  
雙峽外六鰲何得上絳綸

天上雲龍際會時山間烟水自依依江魚莫道  
無朝食敢謝南陽憲布衣

故人唯喜得身還廊廟誰卑諫議官千尺釣臺  
看草沒乾坤何處定長安

七里澄江百尺桐古祠香火一漁翁垂綸欲識  
當時意為問冥冥天際鴻

少日論交長大踈相知何必志相符豈無仁義  
匡王業已付侯生一紙書

殷勤天上故人留還向江濱守一丘光景如今

何似漢祠前風雨更維舟

張鏜

秋暮黃花獨盛開春山惟見釣鰲臺  
桐江一線垂千古樂道高人不再來

李貴

垂釣滄波一故人寧驚帝座不為臣  
當年若叶飛熊夢肯擲漁竿學渭濱

夏浚

客星常伴舊漁磯休道先生心事違  
一自羊裘

物色後山青水綠故人非

凌玄德

三聘慙慙君意重一宵辭去念頭輕  
非是狂奴仍故態雲臺今已草青青

萬頃烟波枕碧嵬高風千古不塵埃  
慙慙為問祠前樹近有誰來傍釣臺

謝守淳

鱗閣雲臺一羽翎青山兀坐水泱泱  
笑余夜半羈棲者常近天顏非客星

諸大綬

釣臺突兀倚青天絕勝雲臺萬古傳未必客星  
真犯帝諛臣元目忌高賢

桂紹祖

高節清風曷可倫令人千古仰芳名天生賢哲  
鍾靈運海嶽山川聚一人

謝恩

妻交可易問朝臣廢郭移陰自有倫高坐釣臺  
全故舊先生非是只鮑貧

澤沲渡後漢維鯁不作王臣願作賓焉老擇君  
傷蒼苾到頭有愧釣魚人

黃

白雲源上瀨黃葉晚蕭蕭垂釣

在清風軋

斗杓

繫榜瞻遺像令人喜愧兼一絲重九萬千古仰

尊巖

物色登天府依然故態狂軟紅塵不染歸占水

雲鄉

率土莫非臣誰能獨抗塵不逢明聖主那得遂  
閑身

陳沂

漢帝比唐堯先生學許巢此心猶未識那謂布  
衣交

周憲

仁義為耕耨經綸付釣絲清風千古在頑懦有  
餘師

王叔果

桐江風落客星寒又過嚴陵七里灘一自羊裘  
侵帝座青山千古尚漁竿  
太守尊中綠未拈清醪歸櫂醉還沾君房可怪  
狂奴態山郡于今尚姓嚴

李攀龍

嚴陵物色動新年解纜春回七里舡綉嶺更宜  
殘雪映釣臺高並客星懸灘聲乍合三江壯山  
勢遙臨百越偏此日青陽瞻帝座羊裘深媿昔

人賢

章衮

昔過子陵祠雲烟迷咫尺今茲復來游軒楹淨  
如拭扁舟苦不寬如馬重羈勒竭來此登臨昭  
矚真無極群峯壯欲飛幽瀨鳴相激林深日蒼  
涼風清毛灑浙雲霞自曉昏題味雜今昔已躋  
杳杳臺更踞高高石暫拋北關心快展南溟翼  
世俗日衰頹互端忽肥瘠娥姦各爭妍軟美競  
投隙所以嚴子陵羊裘甘遠適孤峰信絕倫無  
乃太拘窄吾觀聖賢心扶顛還拯溺用行舍藏  
藏孔門有成式豈必務潔身而不同休戚中庸  
不可能此語非訛暖王公當仁豪劉子駕已逸  
折衷契我心千載誇雙壁

王世懋

穎陽先生一瓢後卓犖獨教桐江廬蠶叢高士  
有嚴鄭亦賴子雲能著書澤中不作羊裘坐世  
上那有蒲輪車富春灘頭兩峯秀客星不隱將  
安知君王自美建武政處士適際玄纁初名成

萬古祠宇在漢社洛陽久已墟清輝似染水長  
碧高韻欲與風俱踈千尺休疑下綸處此翁釣  
竒非釣魚徘徊宇下三嘆息獨立高臺意有餘

張文熙

天下豈腥物巢父獨洗耳至人秉竒尚萬鍾如  
散疑此道千載希漢有羊裘子雅志在寥廓汨  
然無所喜天子魯及門偃仰卧弗起以足加帝  
腹客星奏太史匪作傲世態故人誼乃爾黃屋  
且不知萬物孰能滓高風薄蒼旻芳名耀耒耜

陳洪濛

先生之風清且高千尺垂竿托以逃龍衮不知  
天子貴羊裘自着野人袍富春臺峻魚忘餌楊  
子江深手弄濤鼎鬲浮雲等巢許功名飄絮愧  
蕭曹

張正學

先生非是愛逃名龍德深潛行已成不把一絲  
墜桐水其能九鼎奠東京修修鴻羽懸孤表落  
落雲臺失衆英漢室中興今已矣高風惟見釣

臺清

蕭原

不倚當時寵寧論身後名柰何千載下尚爾說  
嚴陵

君隱非無意予行亦有心此心如不愧山水共  
高溪

美人與我期共卧嚴灘月薄暮人不來長風度  
清樾

茅坤

山川幾易姓祠宇獨經時不見披裘叟誰疇  
古詞淒風喧塞雀落日嘯寒鷗二氣江蘋蕙空  
林寄所思

客星今不見姓却挂南州一日狂奴態千年江  
水流林花開更落社燕夏還秋漢帝旌旄色猶  
疑訪釣裘

張子仁

樹密蒼山合風高溪水寒憑虛一以眺千古釣  
臺端



龔大器

高臺落日繫扁舟，獨坐江臯看水流。  
烟霧茫茫漁遂杳，一聲吹落萬峯秋。

鷗鷺群飛過野塘，桐江烟水正茫茫。  
得魚沽酒邀明月，披看羊裘勝鷓鴣。

百尺絲竿坐水隈，故人物色等閑來。  
羊裘謾道非纓冕，千古昆陽一釣臺。

醉裏跏趺坐石床，投竿一濯向滄浪。  
從來野性無拘管，不是狂奴傲帝王。

一絲獨釣桐廬水，千古猶餘江上臺。  
風靜鯨鯢常遠避，月明鷗鷺不相猜。  
暫辭林壑歸朝市，便有星文動上台。  
我亦楚江漁隱客，兼霞風雨又重來。

一曲陽春調孤帆，雪夜舟江深。  
漁遂杳，村暝酒旗收，路遠嚴陵瀨。  
溪凝劍水流，梅花頻入夢，歸思滿滄洲。

林偕春

世情多險巖，落井翻下石。  
丈夫各有志，安能受

驅迫所以嚴子陵脩然爲漢客雖欲諫議之堅  
卧不可得九鼎賴垂絲七里標遺跡我来拜祠  
下躡級登危石環視蒼山高俯見溪水碧浮雲  
變古今斯名永無極慷慨一以歌壯懷長矜式  
誰謂千載遙相遇猶旦夕  
客星何爲者熠熠夜来明豈識狂奴態應徵  
聖主情故人同卧起加足若平生太史無勞奏  
曾虛咄咄聲

費堯年

卧榻狂奴動客星石臺猶峙把竿亭人知傲帝  
緣同學彼忍忘君愛獨醒受祿終身全禮數報  
書雙語凜儀刑高風直節誰能並留得春山萬  
古青

鄭銳

世人但說先生隱豈識先生不仕心輔義懷仁  
言耿耿漢家九鼎一絲輕  
桐江之水勢悠悠千古清風釣不休誰謂雲臺  
軒冕貴詎能博換此羊裘

陳桂

赤龍天上駕群才何獨逃名卧釣臺明月一竿  
應自得玄纁三聘只虛來江山寂寂空秋草雲  
石蒼蒼積翠苔夜半客星無復見高風千古抗  
浮埃

陸萬鍾

雙臺突兀倚山隅今古烟波一釣徒鷗鷺不驚  
江月曉風雲長伴客星孤絲綸自是齊男子諫  
議寧爲漢大夫謾道咄嗟能下汝故人原未識

狂奴

淪波寂寞自垂綸翻爲羊裘物色新文叔差強  
非舊侶君房故是一痴人礮溪笑爾承歸聘異  
綺終能不漢臣釣石祇今江上老空疑太史動  
星辰

林叢槐

不妨逆旅微菜酒佳節登臺喜獨狂醉竹無心  
依岸綠霜花有意向人黃鯉肥秋老揚鱗懶鴈  
叫風高振翮忙縱步磯頭尋釣處渙翁蕩槳咏

滄浪

三章适

昔年懷寶地千古尚知名白石雙臺峙寒江一  
道橫山同高士介水似聖人清來往祠前客溜  
溜空復情

又

山水最清處沿洄獨晚行片雲天際卷孤月嶺  
頭明畏餌魚全沒歸林鳥不鳴自來真隱地千  
載愧浮名

孫文英

雙臺尚峙月光明何事江樓註客星物理自持  
天象見身謀不較道石亭巍軒笑傲佳山水清  
節流傳萃俊英漢室鯨其基無處在臨川星閣有  
先生

魏良靜

荒祠堪駐馬更上釣魚臺古樹濱江起清風拂  
面來漢廷勞物色天上動星台節義輝青史千  
年士氣培

北嶺風塵翳滿頭，浪聞何處有羊裘。宦遊今日  
桐廬地，眼見當年漢水秋。百尺釣臺蒼蘚合，數  
椽祠宇白雲浮。客星依舊輝長夜，爲喚先生未  
不收。

李珊

建武當年幸御駉，故人卧榻共徘徊。羊裘不逐  
浮雲去，魚釣長隨流水來。大節一生輕萬乘，清  
風千古重孤臺。停舟瞻汜危磯下，終夜星辰熒  
北隈。

邵蕢

誰將物色重枌榆，御寢同來足亦舒。夢入摩空  
飛鳥倦，神隨入定老僧如。清江碧石星猶客，七  
里雙臺風尚廬。不是先生輕漢拜，君臣常得水  
和魚。

又

水綠山蒼映白榆，絲綸自在卷還舒。原知故舊  
情無盡，都付江雲興自如。帝業到今非漢有，嚴  
灘從古是吾廬。營營名利何時已，不見竿頭受

釣魚

又

諫席分樽俎飄然不可留  
冥鴻自遠舉縮戈安能謀  
悠悠江中釣洒洒山下裘  
清風仰無盡白頭嗟遨遊

又

貧賤交難倚烟波意自長  
誠看軒冕貴終在網羅  
傍壁石中流見危亭萬樹蒼  
至今有高尚還念子陵鄉

吳文華

來尋高壩正朝暎一酌清醑  
出澗蘩太史從占星象異  
故人那識帝垣尊雙臺直與重霄立  
九鼎誰為兩漢存此地塵氛元不到  
行舟虛自費攀援

羊裘偶然着祠宇至今開白日  
雙臺古青霄一鶴迴郡名猶借耀  
炎祚已沈灰入夜藤蘿月清光到酒杯

張程

四七功臣定九州先生高節慕巢由故人天上  
龍為袞男子澤中羊作裘半夜客星驚太史千  
年廟食走諸侯扁舟祠下蒼崖石閣日雄風對  
碧流

王密

富春靈氣何處尋嚴子雙臺憑霄橫江去沙鷗  
空跼跼雲迴野鶴自冥冥漁磯歲月誰為主宦  
海風波每不平輸却先生能濯足長竿萬古振  
高名

嚴灘磯頭水欲冰凱歌聲徹白雲層功成只合  
師馮異身退還應學子陵

胡宗憲

故人軒冕我垂綸出處無心訪渭濱俎豆儼然  
人已遠荒臺千古自嶙峋  
灘迴百折水潏潏烟雨桐江出兩山石徑無人  
苔蘚合釣竿何處可追攀

俞汝為

夜半狂奴犯至尊客星明處是君恩休將魚水

論前事助漢今餘釣石存

張悅

自是先生識趣高却將身勢等鴻毛釣臺不似  
雲臺險肯脫羊裘換錦袍

又

山下祠堂傍水開每多行客拜祠來當時若脫  
羊裘去千載何人說釣臺

榮華只作等閑看生計依然一釣竿千古桐江  
江上路清風猶自逼人寒

陸瑞家

天上有絲垂桐江子陵手執繫漢綱光皇同寢  
傲加足眼視六合殊茫茫客星不為諫議屈富  
春山中自徜徉羊裘謾着非有情帝自物色三  
代英明主不賓高尚士磻溪莘野是誰隣我思  
漢祖踵霸圖詩書風化如踈踈一朝姦雄謀篡  
奪漢人數萬爭獻符哀哉子雲若愚癡美新劇  
秦不丈夫綱常節義容終墜天生異人扶植之  
矣劉俗尚乃丕變東京氣節始於茲蟲生百足



終難殞魏吳十戈殊未定南陽卧龍再興劉忠  
義天成亦有由壯哉先生功大矣後賢宜謂聖  
人儔我笑當今從事者不能舉職復不隱厚顏  
苟祿悞蒼生徒慕先生何為也先生風節天地  
長後人氣節或同方中流砥柱翔千仞憫時尤  
欲扶乾綱嗟時群昧罔知識翻笑狂奴言更狂

又

淡烟橫鎖子陵灘住我歸舟不等閑欲問蒼生  
誰倚仗客星久已落人間

又

狂奴有故態不為天子改憶昔共學年士風卑  
漢代志欲擬巢由爵祿終不愛立懦且廉頑諛  
旨仁義害東京二百年砥柱同覆載

謝表

木落山林晚穿雲度石隈荒祠瞻古像碑碣半  
莓苔漢馭思匡輔冥鴻逝不迴水雲甘自遊物  
色為誰來寢息恬舒足光芒逼上台道尊忘富  
貴痼疾厭氛埃明月一竿竹清風萬古臺感時

重悼古撫景漫啣杯心事幾人契菊花今日開  
興來題醉墨山雨更相催

宋汝鴻

漢家傾廢魏廷殘萬古誰更七里灘龍過幾番  
臺榭古清風還自逼人寒

莘野磻溪趣亦高先生何不重崇褒九重一宿  
同龍卧不脫羊裘換錦袍

江山一帶白雲深高節清風播古今多少簪纓  
臺下過萬鍾不起子陵心

吳哲

潮長平沙春水生嚴瀨七里晚波明臺邊香餌  
澄滄海月下烟蓑冷客星龍衮羊裘成往事桐  
絲漢鼎尚高名當年若得真魚水竿竹何緣羨  
獨清

魚水君臣偶不投釣臺江上幾經秋東京有幸  
登王佐北越何甘老披裘滿目雲山留故態一  
絲漢鼎繫清流懷仁輔義如相就要領終期到  
白頭

楊由建德人

天開勝地因人勝勝地因人勝若何不謂隱淪  
高尚事乃言仁義激頽波和風隔岸繁桃李清  
露喬林附寫蘿巢許縈流聞亦罕往來人說釣  
臺多

謝丰

釣臺高倚半天雲微色光芒射斗文諸將風雲  
空盡閣千秋蘿薛日玄纒潮轟桐水孤狂氣壁  
立清風百代勲誰把見潛論事業巢由稷契本

姜鏡

鳴榔晚向碧江流古屋蒼臺江水秋諫議寧煩  
宣室召熊羆不應渭濱求炎劉帝業千年改客  
座孤星萬古留自是神龍堪隱見詎將巢許薄  
伊周

層霄千古釣臺懸翠栢蒼松尚宛然勁氣不隨  
灘水折高踪常與岫雲騫夔龍勲業渙竿裏巢  
許孤清帝座前借問一絲堪繫鼎何人更把向江天

俞祖善

飛流宛轉遶長空，亭近天門一線通。  
人傑挺生雷清節，地靈融結播高風。  
綸竿臺上機全息，抖擻江頭味不窮。  
怪得中興東漢主，慇懃戀舊禮。  
渙翁

王文炯

嚴亭高倚碧天開，名折清風自漢來。  
秋色烟霞塵外賞，簷前水月鏡中回。  
閑時展興真偏樂，靜裏忘機鳥不猜。  
誰識羊裘終隱客，永傳偉蹟邁雲臺。

朱必上

釣臺臺上四山青，曲曲江灘夜有聲。  
月白風清千古意，羊神彷彿見先生。

又

不羨雲臺列宿名，客星亭上釣絲輕。  
江清月近塵襟滌，一曲滄浪便濯纓。

又

叢爾桐江一釣絲，炎劉九鼎賴維持。  
雲山江水依然在，明月清風對酒卮。

又

危檣高掛一帆風千里雲山指點中爲問釣臺  
清絕處一鉤新月映蒼松

又

回管嚴陵郡山高水亦長如何釣臺跡乃在富  
春陽清風播宇宙雅志在滄浪佐漢名不顯晦  
跡心亦忘五湖爲范蠡下邳是張良功成身預  
退鳥盡弓先藏冥鴻既高舉歸鳳亦遠翔吁嗟  
明且哲萬古流其芳

胡應麟

嚴公昔未遇畊釣日沉溟一朝動人主始識少  
微星余亦任公子垂竿三十齡被髮上高臺浮  
雲空翠屏雙磯拳石邨可坐却望三山游四溟  
袖裡虹霓一千尺手掣鰲魚歸帝庭

重疊嵐光倚翠屏天風吹客上危亭持竿試着  
羊裘坐何處長安有客星

挾策初從帝座回繫舟重上子陵臺峯頭日暮  
狂歌發萬里浮雲海色來

欲向桐君話隱淪千峯寒色對嶙峋青袍可是  
遊奕客不染玄都半樹塵  
百尺綸竿俯碧流危欄天半夕陽愁山靈似識  
携寒意十里魚龍送客舟

范學詩

石臺突兀上干雲曾化宸樞動緯文蓋世英豪  
徒絳紫出塵幽德獨玄纁辭歸深意從誰識節  
義遺風紛阿勲若把雲臺諸將較子陵尚未肯  
平分

過釣臺

洪陽張

青青巖州山湛湛桐江水地無君子名孰起清  
風天壤與終始先生不戀漢公卿豈愛千秋萬  
代名眼前身後聊相博賈豎之庶奚足稱六翻  
冥冥避羅罽萬衆親召尚不屈樓船簫鼓日何  
人糊名易書還自乞

再過釣臺

渭水投竿為定周南陽諸貴已安劉世平最穩  
烟霞卧身屈寧遺爵祿羞翠壁紫蘿含宿霧澄

金臺集卷之六  
一百六十八  
潭濯石急寒流英雄豹隱非無事冷眼金貂情  
敝裘

瓊臺王弘誨

由來龍性固難馴出處當年或有因未必客星  
侵御座豈緣狂態忤痴人山川貌姓風流遠祠  
宇標題歲月新我亦投竿滄海客登臺何處挹  
芳塵

游震得都御史

清渭桐江共釣絲丹書曾作帝王師一從雜霸

垂家法已遠成周創業時中興人物雲臺盛間  
氣君臣天象移仁義阿諛分世道茫茫烟水繫  
吾思

客星亭

郭子章

孤亭寂寞富江津獨攬清風護隱淪臺烟少微  
星是客綸垂急瀨道為尊飛帆蹴浪侵簷密老  
樹浮雲入檻頻歸去買山猶恨晚緋緬塵路又  
三春

釣臺次劉芝陽中丞韻

高卧雙臺釣碧灘故人勁節跨噴岷羊裘不着  
風塵色鳳閣空懸諫議官雲鎖桐江春水濶星  
窺客館夜光寒憐予亦有烟霞癖結伴何年戴  
鵝冠

釣臺

棹頭緋冕着羊裘七里灘前俯碧流却笑陽鱈  
貪餌者幾能不上子陵鈎

戊子十月望夕舟宿嚴先生祠下詰朝展

謁一首

蜀淇竹衛承芳

雪後疏櫺夢却回荒祠懷古若為栽孤煙翠壁  
牕中起旭日清風樹杪來天地幾人甘草澤鳳  
麟群少自雲臺偏憐昨夜灘頭月猶伴寒星照  
客杯

癸巳首夏重謁謾題

持竿人已去祠額儼如存勝復緣山水清堪徹  
夢魂碑題從墨客香火詫雲孫余亦逃名者重  
過耻具論

拜嚴先生祠

新安范涑



炎祚中興帝座開從龍勲業盡三台共知白日  
回天地更有清風起草萊主聖自容臣節重思  
深誰作客星猜祇今兩岸山無數惟說先生一  
釣臺

再渡嚴瀨

王程往迤一帆便夜渡嚴灘意悄然不謂壯懷  
甘避世却教舞袖漫當筵青峰翠擁苑源路綠  
水光浮剡曲船此景悠悠千古在獨令明月自  
嬋娟

雪後疏櫺夢却回荒祠懷古若為栽孤烟翠斨  
窓中起旭日清風樹杪來天地幾人甘草澤鳳  
鱗群少自雲臺偏憐昨夜灘頭月猶伴寒星照  
客杯

癸巳首夏重謁謾題

持竿人已去祠額儼如存勝復綠山水清堪徹  
夢魂碑題從墨客香火詫雲孫余亦避名者重  
過耻具論

咏

嚴先生臺

閩教授林敦忠

宦遊茲土喜民醇千載羽儀屬富春諸將雲邊  
依日月故人天上動星辰半江宿草埋鍾鼎七  
里寒烟鎖釣綸多少名賢留刻石高山長水抵  
今新

學曾忝司理是邦家大人自舍寄咏一首

大人名敦忠由貢士教授興化嘗兩過拜

謁

先生臺懷出一言而未遂今致休於家代學曾

咏以叙嚮往之志云

萬曆癸巳仲春閩後學林學曾敬述

釣臺歌

陸經

山半東西敞石臺崔嵬石勢凌氛埃俯瞰桐江  
流水碧傍有祠宇臨江開我来承乏艤江滸空  
山木落無人語肅拜先生清廟前先生廟貌烟  
霞古憶昔白水龍興初誰不攀緣競軒舉先生  
投跡此山中漱石耕雲歲幾許人知霄漢客星  
懸不知先生節操扶明主物色旁求視等閑帝

逌一往心何閑玄纁束帛不足貴惟有羊裘簑  
笠歸青山青山可眺水可臨策勲不問雲臺間  
感慨低回日云夕曲磴迢迢秋草碧振衣更上  
千仞岡又見先生釣魚石九鼎微來一線輕烟  
波千載成芳名為看高節雙臺並歸來兩腋清  
風生

詠

嚴先生臺

閩教授林敦忠

宦遊茲土喜民醇千載羽儀屬富春諸將雲邊  
依日月故人天上動星辰半江宿草埋鍾鼎七  
里寒煙鎖釣綸多少名賢留刻石高山長水抵  
今新

學曾忝司理是邦家大人自舍寄咏一首  
大人名敦忠由歲貢教授興化嘗兩過拜

謂

先生臺懷出一言而未遂今致休於家代學曾  
咏以叙嚮往之志云

萬曆癸巳仲春閩後學林學曾敬述

釣臺歌

陸經

山半東西敞石臺崔嵬石勢凌氛埃俯瞰桐江  
流水碧傍有祠宇臨江開我來承乏艤江許空  
山木落無人語肅拜先生清廟前先生廟貌煙  
霞古憶昔白水龍興初誰不攀緣競軒攀先生

投跡此山中漱石耕雲歲幾許人知霄漢客星  
懸不知先生節操扶明主物色旁求視等閑帝  
廷一徃心何閑玄纁束帛不足貴惟有羊裘簑  
笠歸青山青山可眺水可臨策勲不問雲臺間  
感慨低回日云夕曲磴迢迢秋草碧振衣更上  
千仞岡又見先生釣魚石九鼎微束一線輕烟  
波千載成芳名為看高節雙臺並歸來兩腋清  
風生

壬辰自莆陽量移南比部舟過嚴灘有感

孫繼有

遙望巉巖積翠苔  
問人云是子陵臺  
兩臺空對誰為主  
時有清風伴月來

二

一叟何須兩釣臺  
知君留待後人來  
可憐盡是君房輩  
誰把絲竿換鼎台

三

富易交兮貴易妻  
先生未語早知幾  
若須廢郭誅韓日  
脫却羊裘悔已遲

四

誰云帝座客  
星侵料得時  
臣用計深仍恐夜來  
談底事故將象緯  
盡君心



國家圖書館, NATIONAL CENTRAL LIBRARY, TAIWAN, R.O.C.

